

فريق التفريغ بموقع الطريق إلى الله  
يقدم

## اليوم الثامن عشر من "سلسلة الطريق إلى القرآن"

(باللهجة المصرية)

لفضيلة الشيخ : الدكتور / حازم شومان



رابط المادة : <http://www.way2allah.com/modules.php?name=Khotab&op=Details&khid=120>

السلام عليكم ورحمة الله وبركاته ، الحمد لله وكفى وصلاة وسلاما على عباده الذين أصطفى ، ثم أما بعد ، فيأذن الله سبحانه وتعالى هنتكلم النهاردة يا جماعة عن سورة المؤمنون و سورة النور ، معانا سورة المؤمنون و سورة النور هنتكلم الأول عن سورة المؤمنون

### سورة المؤمنون بتتكلم عن إيه ؟

يعني موضوع سورة المؤمنون ، موضوع يعني يعد إلى حد ما جديد في الكلام عنه و خطير جدا يا جماعة ، سورة المؤمنون المفترض إنها بتتكلم عن الدعوة إزاي نكلم الناس عن نعم ربنا ، فلما نكلمهم عن نعم ربنا هيجادلونا ، فلما يجادلونا هنرد عليهم إزاي ، فلما نرد عليهم مش هيبقى كل الرد جدال عقلي ... لأ... لازم هنتكلم عن الله و الدار الآخرة ، يعني سورة المؤمنون بتقول لك إزاي تتكلم في الدعوة ، كان المتوقع إن ده يبقى موضوعها بس و لكن نفاجأ إن ربنا في أول سورة المؤمنون وضع صفات المؤمنين في الأول قبل ما يعلمنا نتكلم إزاي ، وضع صفات المؤمنين في الأول "قَدْ أَفْلَحَ الْمُؤْمِنُونَ الَّذِينَ هُمْ فِي صَلَاتِهِمْ خَاشِعُونَ وَالَّذِينَ هُمْ عَنِ اللَّغْوِ مُعْرِضُونَ" المؤمنون ١: ٣ الصفات بتاعة المؤمنين

### طب ليه ربنا وضع صفات المؤمنين في الأول ؟

عشان كأن ربنا يقول لك صفات الدين قبل كلام الدين ، صفات الدعوة قبل كلام الدعوة ، لازم يبقى صفات الدين فينا الأول قبل ما نخرج للناس ، يبقى أول سورة المؤمنون بادئ بالصفات يا جماعة عشان نفهم فكرة النموذج

### إيه فكرة النموذج ؟

فكرة النموذج إن لازم إحنا الأول كملتزمين نبقي نموذج عشان لما نخرج للناس نكلم الناس في الدين يتأثروا بينا قبل ما يتأثروا بكلامنا ، عشان كدة ليه الرسول عليه الصلاة و السلام ربنا أعطاه ٢٣ سنة ؟ ٢٣ سنة فتح فيهم العالم كله ، قعد ٢١ سنة منهم بيني في النموذج ، ليه ربنا سبحانه و تعالى بدأ الأول بتربية أي نبي قبل ما يخرج للناس يدعو إلى الله ؟ عشان الأول يبقى نموذج ، لازم الداعية ده يبقى نموذج ، لازم تبقى نموذج وسط أصحابك ، نموذج في كليتك ، نموذج في شغلك ، نموذج معبر عن الدين

### يعنى إيه نموذج ؟

يعنى إحنا كدة يا جماعة ، تخيلوا لو بقى الملتزمين في الفهم ما شاء الله آية من آيات ربنا في الفهم و في العلم و في الدين و في الجهد و في الدعوة مجتهدين جدا وفي الإيمان و العبادة ، أوراد العبادة دى أغلى حاجة عندهم في حياتهم و في الأخلاق أعلى أخلاق ، آية من آيات ربنا في الأخلاق و في المعاملات ، و في الدنيا ناس ظراف و ناس لطاف و ناس ضحواكين و ناس مندمجين مع الناس و متفاعلين مع الناس ، مش الناس في جنب و هما في جنب ، تخيلوا لو

الملتزمين بقوا بالصورة دى وفي الدنيا زى ما هما ده في تجارته وده في شغله وده في عيادته وده في... ، كل واحد في الدنيا بتاعته زى ما هو ، تخيلوا لو الصورة دى بقت صورة الملتزمين أد إيه هنكسب الناس ؟  
الوقت لما حاولوا إنهم يحاربوا الالتزام أكثر حاجة دخلوا لهدم الالتزام من خلالها هما الملتزمين أنفسهم ، لأن الدعوة دعوه كاملة ما يقدرش يهدمها ، طب يهدم الدعوة إزاي ؟

أهل الباطل ييفكروا من خلال الداعية نفسه ، من خلال الملتزم نفسه ، من خلال إنه يتصيد لك أخطاءك ونقائصك وذنوبك وعيوبك وينشرها ويعملها إعلانات في الإعلام وفي كل حته في العالم ، عشان يهدم الدين من خلالك انت ،  
**عشان كدة فكرة النموذج دى أخطر فكرة مؤثره في الدين كله**

### بناء النموذج

النبي صلى الله عليه وسلم ٢١ سنة كاملة بينى في النموذج ، بعد كدة نبدأ نخرج للروم ، بعد كدة نبدأ نخرج للقبائل الثانية ، إنما النموذج يتبنى الأول ليه يا جماعة ؟ النموذج ده عامل زى الموديل كدة ، أول حاجة أنا عايز اعمل الموديل الأولاني من عربيه جديدة ، بعد ما عملت الموديل ، الإستنساخ سريع ، بعد ما الملتزمين اللي بحق و حقيقى بقوا موجودين ، أي حد هيجى ويشوفهم ، عشان كدة ليه الوقت الشباب اللي بيلتزم جديد بيقى مستواه ضعيف ؟ ليه الملتزمين مستواهم ضعيف ؟ لأن مافيش نموذج ، لأن الوقت اللي داخل الجامع ده ما هو لو لقي ناس مجتهدة في العبادة و ناس مجتهدة في الدعوة و ناس مجتهدة في العلم و ناس مؤمنه عابدة و ناس أخلاق ، هو هيتشكل فوراً على الموضوع ده فوراً ، هيبقى دى حياته ، يبقى إذا أكثر حاجة بتخلي الدين ينتشر وجود النموذج ، وجود الصورة اللي بتعبر عن جمال الدين و روعته

إن الدين ما يفضلش كلام على ورق أو كلام على لساننا مش كلام دين ، صفات الدين تبقى موجودة فينا ، عشان كدة من الحاجات الجميلة جدا في القرآن السحرة بتوع فرعون داخلين يقولوا له **"أَنْتَ لَنَا لَاجِرًا"** الشعراء: ٤١ هتدينا فلوس ؟ طب ها تقربنا منك ولا لأ ؟ و قاعدين يتوشوشوا بينهم و بين أنفسهم و إزاي نغلب موسى ؟!  
**"فَأَجْمِعُوا كَيْدَكُمْ ثُمَّ ائْتُوا صَفًّا"** طه: ٦٤ وفجاءه يخرؤا سجدا **"آمَنَّا بِرَبِّ هَارُونَ وَمُوسَى"** طه: ٧٠ فرعون يكلمهم يقولوا له **"فَاقْضِ مَا أَنْتَ قَاضٍ إِنَّمَا تَقْضِي هَذِهِ الْحَيَاةَ الدُّنْيَا"** طه: ٧٢ كأن حشرة و ماسكة جناح بعوضة اللي هي الدنيا و إتحكم في جناح البعوضة اللي معاك زى ما انت عايز تتحكم فيه **"لَنْ نُؤْثِرَكَ عَلَىٰ مَا جَاءَنَا مِنَ الْبَيِّنَاتِ وَالَّذِي فَطَرْنَا"** طه: ٧٢ يقول لهم هأقتلكم ، لا إحنا ثابتين على الدين ، ها اعمل فيكوا ، إحنا ثابتين على الدين جابوا دا منين ؟... منين يا جماعة السحرة في لحظه واحده إتقلب حياتهم بالمنظر دا ، منين ؟ لأنهم أول ما دخلوا الدين شافوا موسى واقف في وش فرعون بيقول له **"وَإِنِّي لَأَظُنُّكَ يَا فِرْعَوْنُ مَثْبُورًا"** الإسراء: ١٠٢

شافوا موسى واقف في وش فرعون بيكلمه بقمة الرجولة و بقمة البطولة ، فدخل على الدين كدة ، فدخل هو ده الدين ، هو دخل شاف الصورة دى قدامه ، فأما شاف الصورة دى قدامه بقت هي دى الدين قدامه بيقى يا جماعة لما تدخل تلاقى النموذج ده ، لما الناس تدخل تلاقينا نموذج الناس هتطلع لوحدها لما أصحابك اللي بيلتزموا على يدك يلاقوك نموذج هما هيطلعوا قبل ما انت تكلمهم ، لما يلاقوك إنسان عابد و مجتهد و بتجرى هنا و بتجرى هنا

و بتطلب علم و بتضحى عشان الدين و بتبكي من خشيه الله لما تسمع آيات النار هما نفسهم هيقوا كدة من غير ما انت تكلمهم في الكلام ده

عشان كدة في قصة غلام صاحب الإخدود الناس لما الراجل حفر لهم الأخاديد الطاغية ، قال لهم هرميكوا فيها ، هولع فيكوا لو ما رجعتوش تاني ، كان قدامهم رخصة إن هما يقولوا بلسانهم إنهم مش مؤمنين و يفضل الإيمان في قلوبهم ، ليه ما خدوش الرخصة ؟ ليه ؟ لأن قدام عينهم شافوا غلام الأخدود و هو بيتقتل عشان الدعوة ، و هو بيضحى بحياته عشان الدعوة ، فدخلوا على إن الدين كدة ، النموذج ، عشان كدة رسول الله صلى الله عليه و سلم لما أراد انه يدعو أحد المشركين مرة ربطه في عمود من عواميد المسجد ليه ؟ بعض الناس يفسر الموقف ده يقول عشان يشوف الصحابة ثلاث أربع أيام في المسجد كده ، غصبا عنه يشوف الصحابة و يشوف عبادة الصحابة يقول هو ده الدين الحق

كان المسلمين زمان لما يفتحوا بلد ما يسكنوش جواها !! يقوموا بانين لهم مدينة على أطراف البلد ، بينوا المدينة على أطرافها يقوم الناس اللي قريبين منهم يشوفوهم يدخلوا في الإسلام ، اللي بعدهم يشوفوهم يدخلوا في الإسلام ، يدخلوا في الإسلام عن طريق إنهما شافوا المسلمين و عن طريق إنهما شافوا سلوكيات المسلمين ، كان هي دى الطريقة اللي بيدخل فيها في الإسلام

### صفات من أفلح

إنما الوقي يا جماعة للأسف الشديد الحاجة المفتقدة الوقي ، الحاجة اللي مش موجودة الوقي النموذج ، إن إحنا نبقي نموذج للدين عشان كدة ربنا في الأول جاب لك النموذج في وشك كدة **"قَدْ أَفْلَحَ الْمُؤْمِنُونَ"** المؤمنون: ١ **"قَدْ أَفْلَحَ"** أسلوب اليقين ، أسلوب التوكيد **"قَدْ"** مع الفعل الماضي يقين ، هو ده طريق الفلاح ، أفلح ، عارفين الفلاح اللي هو بيعمل الفلاحة ده ما هو نفس الجذر الغوي بتاع الفلاح ، الفلاح يفضل يتعب و يشقى و يبهدل نفسه و يحرق و يصحى بالليل عشان يروي الأرض و يسهر في الأرض و يبجي تاني بعد الفجر ، و بعد كده يقول يا رب طلع لي الثمرة ، ربنا بقدرته يطلع له الثمرة اهو ده اللي إحنا بنعمله في الدين يا جماعة ، إحنا بنتعب في الدين و بنجتهد في الدين عشان الثمرة في إيماننا تطلع وعشان الثمرة في هداية الناس تطلع

### ١. الخشوع في الصلاة

**"قَدْ أَفْلَحَ الْمُؤْمِنُونَ الَّذِينَ هُمْ فِي صَلَاتِهِمْ خَاشِعُونَ"** المؤمنون: ١ : ٢ كلمة **"هُمْ"** دى اللي بتأكد ، والجملة الإسمية دلالة على إن الخشوع ده مستمر مش في صلاة الظهر كنت خاشع و في العصر مانيش خاشع ، مش في التراويح إمبراح كنت خاشع و النهاردة مش خاشع ، مش رمضان اللي فات كان الإيمان عالي في قلبي و رمضان ده الإيمان نازل...لأ...ده أنا الإيمان في قلبي ، المنحنى بتاع الإيمان مستمر في قلبي ما بيتزلش منسوب الإيمان في قلبي غير ذبذبات طفيفة ، إنما مش انزل الأرض و ارجع اطلع تاني و انزل الأرض...لأ المنسوب بتاع الإيمان يعني إيه ؟ الذبذبة بتاعته ذبذبة طفيفة يبقى الاستمرارية **"الَّذِينَ هُمْ فِي صَلَاتِهِمْ خَاشِعُونَ"** المؤمنون: ٢ خاشعون تدل على استمرارية الخشوع في كل الصلوات

## ٢. معرضون عن اللغو

"وَالَّذِينَ هُمْ عَنِ اللَّغْوِ مُعْرِضُونَ" المؤمنون: ٣ يا رب الإعراض عن اللغو جاء بعد الخشوع في الصلاة ليه ؟ لأن الصلاة خلقتك إنسان جد ، الصلاة خلقتك عندك جدية في حياتك اللي يتعامل مع رئيس الجمهورية و على طول شغله مع رئيس الجمهورية ما يتكلمش أي كلام ، ده يقلك ده فلان ده مش عارف و مركزه فين في رئاسة الجمهورية ، ليه ؟ لأنه هو بقى من كثر ما يتعامل مع الشخصيات العظيمة أو الشخصيات الكبيرة بقى إنسان جد في حياته ما يتكلمش غير كلمة جد ، الوقت بتاعه بيحافظ عليه ، كل سلوكياته فيها جدية ، كذلك انت لما توقف بين يدى الملك ٥ مرات في اليوم تخيل كمية الجدية اللي تبقى جواك ، تخيل انت هتبقى جد أد إيه "الَّذِينَ هُمْ عَنِ اللَّغْوِ مُعْرِضُونَ" المؤمنون: ٣ و عشان انت بعد ما صليت و الإيمانيات دخلت في قلبك و نفحات الخلوة مع الله في الصلاة ملت قلبك ، بقيت مانتاش عايز تعكر صفو هذا الإيمان بأنك انت تكلم أي مخلوق ، عشان كده من علامات الصلاة الصبح ، الصلاة اللي بحق و حقيقي إنك انت بعدها تلاقي نفسك ما انتاش عايز تكلم أي حد ولا عايز تقعد مع أي حد ، انت عايز تفضل مع الله ، أنا مش عايز اسيبك يا رب ، أنا خلاص قلبي ولف على الخلوة مع الله سبحانه و تعالى ، كل دى صفات يا جماعة كل دى صفات غير إن لما يبجي الإعراض عن اللغو بعد الصلاة طب ما الناس بتصلي ليه سلوكها ما بتتغيرش ؟ و ليه جديتها ما بتتغيرش ؟ و ليه ما بيزهدوش في الناس بعد ما يصلوا ؟ ليه يا جماعة ؟ لأن كأن ربنا هنا بيقول لنا لازم عبادتك تبقى مثمرة ، لازم تشوف ثمرة عبادتك في سلوكك و ثمرة عبادتك في حياتك و ثمرة عبادتك في بصيرتك و ثمرة عبادتك في كل شيء في دينك ، لازم ثمرة العبادة تطلع ، لازم ثمرة الصلاة تطلع في قلبك و في إيمانك ، لازم عبادتك دى تبقى عبادة مثمرة لو عبادة مش مثمرة يبقى انت العبادة بتاعتك فيها حاجة غلط ، عشان كده دايمًا خذ بالك من ثمار العبادة بتاعتك

## ٣. فاعلون للزكاة

"الَّذِينَ هُمْ عَنِ اللَّغْوِ مُعْرِضُونَ وَ الَّذِينَ هُمْ لِلزَّكَاةِ فَاعِلُونَ" المؤمنون: ٣: ٤ فيه فاعلية في العبادة ، مش أي عبادة في فاعلية ، يعني إنسان له فاعلية في المجتمع ، أنا بطلع صدقة ، في ناس لما بتيجي تطلع صدقة معاها ١٠٠٠ جنيه يديها لأي حد و خلاص المهم يخلص منها و خلاص أو يخلص من الزكاة و خلاص ، ما ينفعش يا جماعة ، يبقى فيه فاعلية لما بطلع حاجة أنا عارف أنا بطلعها فين و عارف هي بتؤثر أد إيه ، و عارف أنا بخدم بيها الفقير أد إيه ، وأنا بخدم بيها الدين أد إيه في فاعلية في العبادة في فاعلية في المجتمع

## ٤. الأخلاقيات والمعاملات

"وَالَّذِينَ هُمْ لِفُرُوجِهِمْ حَافِظُونَ إِلَّا عَلَىٰ أَزْوَاجِهِمْ أَوْ مَا مَلَكَتْ أَيْمَانُهُمْ فَإِنَّهُمْ غَيْرُ مَلُومِينَ" المؤمنون: ٥: ٦ ده إحنا كنا في العبادات دخلنا في الأخلاقيات ، بعد كده هندخل في المعاملات "وَالَّذِينَ هُمْ لِأَمَانَاتِهِمْ" المؤمنون: ٨ أمانتك في وظيفتك ، أمانتك مع زوجتك ، أمانتك مع أولادك ، أمانتك في عبادة ربنا و في حق الله ، أمانتك في حق الرحم ، أمانتك في حق الجيرة ، الأمانات اللي ربنا حملها عليك "لِأَمَانَاتِهِمْ وَعَهْدِهِمْ رَاعُونَ" المؤمنون: ٨

## ٥. المحافظة على الصلوات... العبادات

يعني آية عبادات و بعد كده معاملات ، و بعد كده أخلاقيات ، و بعد كده نرجع عبادات ثاني **"وَالَّذِينَ هُمْ عَلَى صَلَاتِهِمْ يُحَافِظُونَ"** المؤمنون: ٩ ليه ؟ ليه ربنا بدا بالعبادات ؟ لأن العبادات هي الزاد اللي لما قلبك بيتشحن بيه تقدر تطبق تكاليف الدين ، طب ليه ربنا جاب بعدها المعاملات ؟ لأن لازم عبادتك تبقى مثمرة ، لو انت في المسجد شيخ و قاعد تبكي من خشية الله ، و في المعاملات مع الناس إنسان سيء لا تتقي الله ! يبقى عبادتك دى مردودة عليك ، لازم ثمرة العبادات تخرج في المعاملات ، طيب ليه العبادات مع المعاملات مع الأخلاقيات ؟ عشان ربنا يقول إن النموذج ده ناس عندها فهم ، عندها شمولية للدين و عندها عزم مش بيطبق جانب من الدين و يسبب جانب بيطبق كل جوانب الدين ، الفهم و العزم عند هذا النموذج ، و تلاقي ربنا يقول **"قَدْ أَفْلَحَ الْمُؤْمِنُونَ \* الَّذِينَ هُمْ فِي صَلَاتِهِمْ خَاشِعُونَ \* وَالَّذِينَ هُمْ عَنِ اللَّغْوِ مُعْرِضُونَ"** المؤمنون ١: ٣ طب مكان ممكن ربنا يقول قد أفلح المؤمن اللي بيخشع في الصلاة و اللي بيعرض عن اللغو ، ليه ربنا جابها بصيغة الجمع ؟ عشان كأن ربنا يقول إن مش ممكن إنسان يتربى على الصفات دى لوحده أبدا ، لازم بيئة فيها الصفات دى يتربى عليها ... لازم ... ماينفعش تطلع على الصفات دى لوحدهك ، لازم يكون في بيئة هذه الصفات فيها ، انت بتكتسبها فتربى عليها ، و ده بيبين خطورة التربية إن لا نموذج بدون تربية هيطلع نموذج من غير تربية إزاي ؟!؟ العربية الموديل الجميل ده هتعمل إزاي من غير مصنع يصنعها ؟ طب الموديل الجميل ده بتاع المؤمن الفاهم العالم المجتهد المضحي الظريف اللطيف اللي شخصيته حلوة الودود المندمج مع المجتمع اللي أخلاقياته عالية ، النموذج ده هيطلع إزاي ؟

## حوط عبادتك

لابد من التربية في أول سورة المؤمنون بيؤكد خطورة التربية **"وَالَّذِينَ هُمْ عَلَى صَلَاتِهِمْ يُحَافِظُونَ"** المؤمنون: ٩ زى ما اللي بيبني فيلا كده بيحافظ عليها يبني سور من حوايلها و يحوط عليها حوط على صلاتك ، يعني إيه حوط على صلاتك ؟ روح الجامع بدري ، روح الجامع من قبل الإذآن ، روح الجامع عشان تصلي السنة القبلية و بعد كدة السنة البعدية ، تبقى انت بتحوط على الصلاة بتاعتك ، نام بدري عشان تحوط على قيام الليل ، روح الجامع بدري عشان تحوط على تكبيرة الإحرام ، دائما كدة يا جماعة دائما خليك إنسان بتحوط على العبادة بتاعتك بتحافظ عليها ، دى علامة الإنسان الصادق إنما انك انت ما تحافظش عليها أنا ها أصوم بكرة و ما اتسحرتش ما حوطش على الصيام بتاعك لو صيام نفل هتفطر ثاني يوم ، طب أنا بصوم بكرة و بتسحر الساعة ١٢ بالليل ما أنا هاروق نفسي و هيبقى الصيام من غير معاني إيمانية و لا من غير حاجة إنما أتسحر ، يبقى إذا حافظ على العبادة بتاعتك يحافظوون على صلواتهم كلها ، مش ال ٥ فروض (بس) اللي بيصلوهم لربنا ، محافظين على الضحى ، محافظين على الوتر ، محافظين على القيام ، محافظين على ركعات النفل المطلق ، محافظين على السنن القبلية و البعدية **"عَلَى صَلَاتِهِمْ يُحَافِظُونَ أُولَئِكَ هُمُ الْوَارِثُونَ الَّذِينَ يَرِثُونَ الْفِرْدَوْسَ"** المؤمنون: ٩١ الفردوس لم تذكر في القرآن إلا مرتين ، مرة في آخر سورة الكهف اللي إحنا شرحناها ، اللي بتبين الإنسان اللي واقف على ثغر من ثغور دينه ، اللي بيتحرك عشان دينه الإنسان ، اللي لازم يسد ثغر من الثغور ، و مرة هنا في أول سورة المؤمنون ، النموذج اللي لما الناس كلها تشوفه تنبهر بيه ، عشان كده دول أعلى مقامين في الدين على الإطلاق ، الفردوس الأعلى اللي



هي في جوار الله اللي هي سقفها عرش الله سبحانه و تعالى، يعني إحنا بنتكلم عن أعلى مقامات الدين ، إيه صفات النموذج كمان في السورة ؟

### مقام الخوف والخشية والإشفاق من الله

من أخطر الصفات اللي السورة ركزت عليها ، و ده سبحانه ربي يعني في ملمح كدة يعني لما تربطه مع اسم السورة تحس إن الموضوع فيه معنى جميل قوي ، من أخطر الصفات اللي السورة ركزت عليها الخوف ، الخوف ، إن المؤمن ده إنسان شديد الخوف من الله ، السورة من أولها لآخرها ، يا جماعة فاكرين إمبارح لما أتكلمنا عن الإنبياء قلنا من أولها لآخرها لفظ العبادة مكرر فيها إزاي ؟ اهو سورة المؤمنون من أولها لآخرها ألفاظ الخوف كلها ، أكثر سورة في القرآن ذكر فيها مرادفات الخوف هي سورة المؤمنون من أولها "الَّذِينَ هُمْ فِي صَلَاتِهِمْ" إيه ؟ "خَاشِعُونَ"

المؤمنون: ٢ يعني إيه خاشع ؟ خاشع ده يعني "لَوْ أَنزَلْنَا هَذَا الْقُرْآنَ عَلَى جَبَلٍ لَّرَأَيْنَاهُ خَاشِعًا مُّتَصَدِّعًا مِّنْ خَشْيَةِ اللَّهِ وَتِلْكَ الْأَمْثَالُ نَضْرِبُهَا لِلنَّاسِ لَعَلَّهُمْ يَتَفَكَّرُونَ" الحشر: ٢١ قبل ما أي مبنى بيتصدع بيتشقق ، يعني كأن الجبل يتشقق قبل ما ينهار ، ربنا بيقول "وَمِنْ آيَاتِهِ أَنَّهُ تَرَى الْأَرْضَ خَاشِعَةً" فصلت: ٣٩ الأرض بقلها ٦ شهور ما نزلش عليها مياه اتشقت ، كأن ربنا بيقول لك الخشوع ده إنك تتشقق ، إنك تفتت من بعضك زى ما الجبل بيتفتت و إنت واقف بين يدي ربنا ، إنك توقف بين يدي ربنا تترعش من كثر تعظيم مقام الله ، زى اللي واقف بين ايدين رئيس جمهورية يلقي بيان عليه أيديه تقعد تترعش ليه ؟ معظم مقامه

انت و انت واقف في الصلاة بين يدي الملك سبحانه و تعالى واقف بتترعش من كثر الخوف من الله و من كثر إجلال الله سبحانه و تعالى ، ده أولها يا جماعة بعد كده و إحنا ماشيين نلاقي كل الإنبياء بيقولوا لقومهم إيه ؟ "أَنَّهُ لَا إِلَهَ إِلَّا أَنَا" الإنبياء: ٢٥ فايه ؟ "أَنْ اعْبُدُوا اللَّهَ مَا لَكُمْ مِنْ إِلَهٍ غَيْرُهُ أَفَلَا تَتَّقُونَ" المؤمنون: ٣٢ انتو مش خافين ده الأنبياء نفسهم "وَأَنَّ هَذِهِ أُمَّتُكُمْ أُمَّةً وَاحِدَةً وَأَنَا رَبُّكُمْ فَاتَّقُونَ" المؤمنون: ٥٢ خافو مني بل في أربع خمس آيات ربنا جايهم وراء بعض كدة فيهم ألفاظ خوف خوف عجيبة جدا "إِنَّ الَّذِينَ هُمْ مِنْ خَشْيَةِ رَبِّهِمْ مُشْفِقُونَ" المؤمنون: ٥٧ يبقى الخشية و الإشفاق "وَالَّذِينَ هُمْ بِآيَاتِ رَبِّهِمْ يُؤْمِنُونَ وَالَّذِينَ هُمْ بِرَبِّهِمْ لَا يُشْرِكُونَ وَالَّذِينَ يُؤْتُونَ مَا آتَوْا وَقُلُوبُهُمْ وَجَلَةٌ أَنَّهُمْ إِلَى رَبِّهِمْ رَاجِعُونَ" المؤمنون: ٥٨: ٦١ يعني لفظ الخشية و لفظ الإشفاق و لفظ التقوى و لفظ الوجل ، إيه الألفاظ دي كلها يا رب ؟ و لفظ الخشوع في الأول و لفظ التقوى في وسط السورة إيه ده ؟ ده انت كمان لما تيجي في الشوط الأخراي بتاع التذكير بالآخرة و الموت و القيامة و الحساب و الوزن و العرض على الله اللي نزل بالتذكير بتاع الآخرة بيه على ظهور و قلوب المشركين و المعرضين عن الله قبل ما ربنا يتكلم عن "حَتَّىٰ إِذَا جَاءَ أَحَدَهُمُ الْمَوْتُ قَالَ رَبِّ ارْجِعُونِ" المؤمنون: ٩٩ قبل ما ربنا يقول العذاب بتاعهم ، شوف ربنا بيقول إيه "وَقُلْ" قل يا محمد وليقل المؤمنين من بعدك "قُلْ رَبِّ إِنَّمَا تُرِيدُنِي مَا يُوعَدُونَ" المؤمنون: ٩٣ يا رب لما توريني العذاب اللي انت وعدتهم بيه "رَبِّ فَلَا تَجْعَلْنِي فِي الْقَوْمِ الظَّالِمِينَ" المؤمنون: ٩٤ يعني كأن ربنا بيقول قول يا رب لما تعذبه ما تعذبنيش معاه يعني إيه ؟ طب ليه ؟ ها نقول ليه

يا جماعة ؟ ليه ربنا بيوهجنا للخوف الشديد لهذه الدرجة ؟ ده لدرجة إن كأن ربنا بيقول لنا خافو من العذاب اللي أنا أمرتكم انكوا تروحوا تهددوا بيهم ، ده آخر السورة بعد ما شوط الترهيب و النار ذكر في الآخر ، آخر آية

"وَقُلْ رَبِّ اغْفِرْ وَارْحَمْ وَأَنْتَ خَيْرُ الرَّاحِمِينَ" المؤمنون: ١١٨ يا رب ما تعذبنيش بذنوبي و شيل الذنوب من عليا يا رب ، ليه الخوف الرهيب اللي في السورة ده يا جماعة ؟ ليه ؟ ده كمان شوف التنوع ، ربنا يجيب لك لفظ الخوف و لفظ الخشية و لفظ الوجل و لفظ الإشفاق ، إيه هو الخوف و إيه هو الخشية ؟ إيه الفرق بين الخوف و الخشية ؟

**إيه الفرق بين " الخوف ، الخشية ، التقوى ، الوجل ، الإشفاق " ؟**

**الخوف:** هو خوف عقاب الله يعني النار ، و **الخشية:** هي خوف مقام الله ، الخشية خوف مع التعظيم **الخوف:** هو ثمرة معرفة النار ، إنما **الخشية:** هي ثمرة معرفة الله ، عشان كدة الخشية أعلي بكثير ، الخشية هي خوف مع التعظيم ، امال التقوى هي إيه ؟ **التقوى:** إن الاثنين دول جواك و أدوا إلى انك انت عمليا بقيت بتتقى المعاصي في طريقك عشان ماتقعش في عقوبة ربنا

إمال الوجل هو إيه ؟ **الوجل:** ده إحساس ليلة الإمتحان يا ترى هيحصل إيه ؟! و انت مذاكر و بتذاكر ، مش مش مذاكر ، يا ترى هيحصل إيه ؟! و يا ترى الدكتور هيقول ليا إيه ؟! و يا ترى هاجاوب و لا لأ ؟! و يا ترى هافتكر و لا لأ ؟ و لو ما افتكرتش هيحصل إيه ؟ اهو هو ده الوجل **"وَالَّذِينَ يُؤْتُونَ مَا آتَوْا" المؤمنون: ٦٠** قاعدين

يصلوا و يصوموا و يزكوا و يحجوا و يعملوا الخيرات كلها و قلوبهم وجله بتترعش ، يا ترى لما هنعرض على ربنا هيقول لنا إيه ؟ و ها يقبل مننا و لا لأ ؟ طيب لو ما قبلش مننا ، **طيب لو سألتني عن الذنوب اللي عملتها أقول له إيه ؟ طيب لو ماغفرش ليا الذنوب اللي بتاعتي هيحصل إيه ؟** وجل ، ارتعاش ، إحساس ليلة الإمتحان ، إحساس الطالب و هو جوا الجنة ، و هو لسه داخل في أول دقائق وورق الامتحان بيتوزع ، و لسه ما يعرفش الأسئلة اللي هيشوفها عارف إجابتها و لا مش عارف إجابتها ؟ من اللي ذاكرها و لا لأ ؟ ده الوجل يا جماعة

امال إيه الإشفاق ؟ **الإشفاق:** برضه يعني لما أقول لك أنا مشفق عليك يعني انت صعبان عليا ، اهو الإشفاق ده ، طيب ، يا ترى هيحصل فيا إيه لما ادخل القبر ؟ و يا ترى هيحصل فيا إيه لما أقوم من الصراط ؟ و يا ترى هيحصل إيه و أنا بيتوزن أعمالي ؟ ده الإشفاق ربنا جاب الباقية الهائلة دى من ألفاظ الخوف عشان يقول لك قلب المؤمن دا لازم يبقى جنبه مليانه بأشجار الخوف و الخشية و الوجل و الإشفاق و الخشوع و التقوى

يبقى سوره المؤمنون من أهم صفات النموذج الخوف الشديد من الله ، ده اسمها سورة المؤمنون ، المؤمن ده يعنى من ضمن الجذر بتاعها من الأمن إنك انت مآمن لربنا ، ايوه أنا مصدقك ، يا رب أنا مصدق إن كلامك ده حق يا رب ، فيه آمن ، آمنت الله ، يعنى ربنا هو مصدر آمنك في الدنيا و في الآخرة ، يعنى **كأن ربنا بيقول لك عايز الأمن ؟ خاف مني**

الكلمة بتاعه الحسن البصري ، الكلمة بتاعة الرسول عليه الصلاة و السلام حديث الرسول الأول ، قال الله عز وجل **"و عزتي لا أجمع لعبدي أمين و لا خوفين ، إن هو آمنني في الدنيا أخفته يوم أجمع فيه عبادي ، و إن هو خافني في الدنيا أمنتته يوم أجمع فيه عبادي"** صحيح اهو ده ، عايز ربنا يؤمنك في الآخرة و في الدنيا ؟ خاف من الله ، ولو ما خفتش من الله ربنا سبحانه و تعالى لن يؤمنك في الدنيا و لا في الآخرة ، عشان كدة يا جماعة اسم السورة المؤمنون ، و مع ذلك السورة مليانة كلام عن الخوف من الله لأن دى من اخطر الصفات اللي بتكون النموذج من الصفات اللي بصفات النموذج اللي المذكورة في السورة

## الدعوة والعبادة... وحدة الأمة

"وإن هذِهِ أُمَّتُكُمْ أُمَّةً وَاحِدَةً وَأَنَا رَبُّكُمْ فَاتَّقُونِ" المؤمنون: ٥٢ أمه واحدة ، الوحدة : إن إحنا نبقي وحدة ، إن اللي يبص لنا من بره مايلاقيناش متنازعين ، مايلاقيناش متفرقين ، لاحظوا إن في السورة اللي قبلها على طول اللي قبل سورة المؤمنون سوره الإنبياء ربنا قال برضه " **إِنَّ هَذِهِ أُمَّتُكُمْ أُمَّةً وَاحِدَةً** " الإنبياء: ٩٢ ربنا ذكر في الاثنين الأمة الواحدة

سورة الإنبياء كانت بتتكلم عن إيه ؟ العبادة ، و سورة المؤمنون بتكلمنا عن إيه ؟ الدعوة إلى الله ، النموذج اللي إحنا هندخل ندعو بيه الناس ، هنتكلم دلوقتي بتتكلم عن الدعوة إزاي ؟ و كلام الدعوة و قبلها صفات الدعوة ، كأن ربنا بيقول عشان تبقوا أمة واحدة اللي هيوحدكوا مع بعض الدعوة و العبادة ، يبقى عرفت إحنا مختلفين ليه ؟ عرفت إحنا متفرقين ليه ؟ لأن إحنا ناس فاضيه ، لأن إحنا أصلا فاضيين لبعض ، **إمّا إحنا لو منشغلين بالدعوة و العبادة مش هنفضي لبعض** ، غير إن الدعوة بتوحدنا ليه ؟ و العبادة بتوحدنا ليه ؟ العبادة بتوحدنا لأنها بتطهر قلوبنا و بتعلمي قلوبنا إيمان فمافيش حقد و لا حسد و لا غل من بعض ، فمأحش يكره الثاني و لا يحقد على الثاني و لا يرفع باسم الدين ، هو حاسد الثاني أو حاقد على الثاني ، إمّا باسم الدين يقول لك لا ده فلان كذا و فلان كذا ، و في نفس الوقت لو اشتغلنا في الدعوة يا جماعة هنعرف المصيبة كبيرة أد إيه ! هنعرف البلوة كبيرة أد إيه ! لما نزل و نشغل في الدعوة هنعرف الوضع ، يعني كمية الضياع اللي فيه أد إيه !

فنبداً بعد ما كنت بأقول لك ده انت بتعمل كذا و نبداً نتفرق مع بعض ، ده إحنا يا جماعة لو كمان خمس آلاف يعني تيار إسلامي فوق التيار بتاعنا مش هنكفي مقاس العالم و لا الثغور المفتوحة للدين ، يبقى الاثنين دول هما اللي بيوحدوا الأمة يا جماعة ، الاثنين دول هما اللي بيوحدونا ، الدعوة و العبادة

عشان كدة دايما بص للإنسان اللي بيشيع الفرقة تلاقيه ضعيف جدا في الدعوة و ضعيف جدا في العبادة ليه ؟ و دايما بص للناس اللي بتتكلم عن الإئتلاف و إن إحنا نبقي يد واحدة و قلب واحد تلاقيهم مختلفين في الدعوة و العبادة ليه ؟ هو ده كلام ربنا ، هو ده دين ربنا ، ربنا قال هنتوحد في الحاليتين دول ... إمّا دلوقتي الواقع تحسبهم جميعا و قلوبهم شتى ، الوقتي تلاقي ده بيهدم ده ! ده يرد على ده ! بهدم ! طيب انت يا ابني ده هدمك ترد عليه ليه ؟ ليه ترد عليه ؟ هو جدار و انت جدار ، هو بيهدمك تهده !!! ده انت بتهد الدين كدة !

**الحل في هذا الواقع يا جماعة إن إحنا نبقي طوفان من التسامح مع بعض ، طوفان من الحب مع بعض ، طوفان من الولاء الحقيقي اللي ربنا كلمنا عليه في القرآن مع بعض** ، هو ده الحل في هذا الواقع ، يبقى يا جماعة هي دي صفات النموذج

## النموذج : دين... عبادة... دعوة

هو ده النموذج اللي إحنا عايزين نبقي فيه ، الصفات الإيمانية دي و الفهم ده و العزم ده و العبادات دي ، الصفات دي يا جماعة و التعامل مع الناس و الإنفتاح على الناس و خدمة الناس ، و رعاية أمانات الناس و إن إحنا نبقي أيد واحدة و قلب واحد و مؤتلفين و بنحب بعض ، بالصورة دي نخرج للناس ، و نشوف لما هنخرج للناس



بمذه الصورة هيحصل إيه ، يا جماعة ساعتها يعنى الجهود اللي إحنا بنعمله ، إحنا عايزين نرعب الناس من النار بيكائنا من خشيه الله لما تقرا آيات النار قدامنا قبل كلامنا عن النار

عايزين نرهد الناس في الدنيا بزهنا فيها و حطنا ليها تحت جزمنا قبل ما نكلمهم عن الزهد في الدنيا ، عايزين نشوق الناس للجنة بتضحياتنا عشان الجنة قبل ما نكلمهم عن الجنة ، يعنى لما واحد ييجى يكلم الناس عن الجنة ، جاي أكلمكم عن الجنة و له أيد طيارة ده ليه ؟ ده أنا كنت بجاهد في سبيل الله ، نفسي إني أنال الشهادة عشان ادخل الجنة بس للأسف لسه ما نلتهاش ، أى كلمه هيقلها عن الجنة هتبيكهم ، لما واحد ييجى يكلم الناس عن النار و هو نفسه بيكي و هو بيتكلم خلاص ده بكأوه ، ده أكثر أثر في قلوبهم من الكلام بتاعه عن النار ، عايزين نبقي نموذج

عشان كدة أنا أحياناً لما ، يعنى الواحد كان بيروح بعض دروس القرى فتلاقى بعد ما الدرس خلص يقول لك إيه بتاع إدارة المسجد حضرتك إتفضل عندي شويه ليه ؟ عاملين لحضرتك عشا بس كدة ، عشا إيه يا عم الشيخ عيب عليك ده أنا اجي أكل على حساب الناس؟! إحنا اللي جايين ندعو إلى الله نروح نأكل على حساب الناس؟!؟! ندفع الناس عشان يسمعونا و إحنا بنتكلم عن ربنا ؟ **إحنا اللي نحب الأكل للناس عشان الناس ترضى تيجي تسمعنا عن ربنا** ، دا إحنا يا جماعة اللي المفروض ، عايزين نبقي الصفات دى يا جماعة ، عايزين نبقي كدة عشان فعلا الدين ينتشر في العالم كله

طيب سورة المؤمنون بقى بعد النموذج اللي في الأول ده ، فكرة النموذج الخطيرة دى اللي هي أخطر فكرة عايزين فعلا تتأصل عندنا إن إحنا نبقي نموذج ، تبقى انت نموذج قدر ما تستطيع في كل مكان انت موجود فيه ، و النموذج خذوا بالكوا مش معناه الأخلاق بس ، النموذج يعنى الدين عندك و العبادة عندك و الدعوة عندك ، لأن فيه بعض الناس يقعد يقول لك إيه الأخلاق ، الأخلاق ، خليك أخلاق و انت تكسب الناس ، لا يا حبيب قلبي مش الأخلاق بس اللي نكسب بيها الناس ، المنظومة دى على بعضها ، أما الناس تشوفك أخلاق و في نفس الوقت تشوفك مؤمن و تشوف المصحف في ايدك و المصحف في جيبك و تشوفك عابد و تجتهد عليهم بالدعوة ، الناس ما بتتغيرش بالأخلاق بس الناس بتتغير بالصورة دى على كلها ، على بعضها مش بملح واحد منها ، بعد كدة الصفات موجودة اخرجوا لكلام الدعوة ، سورة المؤمنون لو انت عايز تعرف ترتيبها بقمة السهولة ، فكرته ظريفة أوى يا جماعة ، فكرته بيان دعوى ، درس دعوى ، عبارة عن إيه ؟ أول حاجة نكلم الناس فيها إيه في الدعوة ؟ نعم الله ، مش إحنا أتعلمنا ده من سوره النحل ؟ **أول حاجة نكلم الناس فيها في الدعوة نعم الله**

**نعم الله**

**"وَلَقَدْ خَلَقْنَا الْإِنْسَانَ مِنْ سُلَالَةٍ مِّنْ طِينٍ"** المؤمنون: ١٢ ربنا الأول ، يعنى الكلام ده ربنا بيقوله عشان تأخذه بعد ما تعرضه على قلبك تأخذه تقوله للناس نعم ربنا ، على أد ما تعرف تتكلم عن نعم ربنا على قد ما ربنا يفتح لك **القلوب "وَلَقَدْ خَلَقْنَا الْإِنْسَانَ مِنْ سُلَالَةٍ مِّنْ طِينٍ"** المؤمنون: ١٢ سلالة يعنى حاجة أتسلت من وسط حاجة ، انت كنت وسط ٣٠٠ ، ٤٠٠ مليون حيوان منوي ربنا سلك من وسطهم ، كأ ربنا بيقول لك شوف أنا أكرمك أد إيه ؟ انت كنت يعنى ٣٠٠ ، ٤٠٠ مليون واحد بيتخانقوا على حاجة و أنا طلعتك انت من خلاهم ، شوف نعمتي

عليك أد إيه ؟ شوف كان فرصة وجودك للحياة نسبتها أد إيه ؟ من سلالة و من طين بعد كدة شوف عملتك إيه ؟  
**"مِنْ سُلَالَةٍ مِّنْ طِينٍ"** المؤمنون: ١٢ وربنا برضه في سورة ثانيه قال **"مِنْ سُلَالَةٍ مِّنْ مَّاءٍ مَّهِينٍ"** السجدة : ٨ يعنى سلك  
 يعنى انت حاجة منتخبة من الطين مش أى طين ، و حاجة منتخبة من الحيوانات المنوية و لكن ماتنساش برضه إن  
 هي أصلها كانت مَنى و أصلها كانت طين فافتكر أنا كرمتك قد إيه

**"ثُمَّ جَعَلْنَاهُ نُطْفَةً فِي قَرَارٍ مَّكِينٍ"** المؤمنون: ١٣ مين اللي عمل لك القرار المكين ده ؟ ده العلماء بيقول لك إن المرأة  
 ممكن لو وقعت من الدور الثالث أى حاجة في جسمها تتكسر أو تتخلع من مكانها إلا الرحم من كثر التثبيت اللي  
 ربنا ثبت فيه الرحم ، مين اللي خلق لك القرار المكين ده ؟

**"ثُمَّ خَلَقْنَا النُّطْفَةَ عَلَقَةً"** المؤمنون: ١٤ و العلقه بقت مضغة والمضغة بقت عظام و العظام بقت لحم ، لو بصيت على  
 منظر الجنين في الشهر الثالث و لا الرابع ممكن تذهل إيه المنظر الوحش ده ؟!؟ منظر صعب جدا ، لو انت كنت  
 خرجت كدة للدنيا كان بقى منظرك وحش أوى

**"ثُمَّ أَنشَأْنَاهُ خَلْقًا آخَرَ ۖ فَتَبَارَكَ اللَّهُ أَحْسَنُ الْخَالِقِينَ"** المؤمنون: ١٤ ، شوف خلقت شكلك جميل إزاي ، شوف  
 عدلت لك شكلك إزاي ، شوف جملت لك و حسنت لك شكلك إزاي ، كل دى نعم

أنت راجع إلى الله

**"ثُمَّ إِنَّكُمْ بَعْدَ ذَلِكَ لَمَيِّتُونَ"** المؤمنون : ١٥ ، افتكر بقى إن بعد كل ده انت راجع لي ، هاحاسبك على نعمه نعمة ،  
**"ثُمَّ إِنَّكُمْ يَوْمَ الْقِيَامَةِ تُبْعَثُونَ"** المؤمنون: ١٦ من الحاجات الطريفة جدا في الآيات هنا يا جماعة إن ربنا لما اتكلم عن  
 الموت أكدة بثلاث مؤكدات و أما اتكلم عن البعث أكدة بمؤكد واحد رغم إن الموت كل الناس يعنى هتموت ، آه  
 هأموت طبعا ، طب انت هتبعث ؟ واحد هيقولك آه ، وواحد هيقولك لا ، و اللي بيقول ده آه ممكن يكون موقن  
 و ممكن يقول شاكك ، يعنى إذا اللي محتاج يتأكد بعشرين مؤكد هو البعث ، الموت مش محتاج تأكيد أصلا  
 ربنا أكد الموت بثلاث مؤكدات: **"ثُمَّ إِنَّكُمْ"** إنكم اهو **"بَعْدَ ذَلِكَ لَ"** اللآم بتاعه التوكيد أو اللآم بتاعه القسم أهى  
 لام التوكيد ل ، **"مَيِّتُونَ"** ميت جت بالصيغة الأسمية مش لا تموتون و الكلمة الإسمية يا جماعة بتدل على الثبوت ، و  
 بتدل على التوكيد

إنما مع البعث: **"ثُمَّ إِنَّكُمْ"** اهو إن ، اهو **"يَوْمَ الْقِيَامَةِ"** لتبعثون لأ **"تُبْعَثُونَ"** بس ، طب مبعوثون اسمية ؟ لا تبعثون  
 فعلية ، يعنى ربنا أكد الموت بثلاث مرات ليه ؟ يعنى أنا لو ربنا ادانى أربع ساعات اكلم الناس فيهم عن الدين  
 هاتكلم ثلاث ساعات عن الموت و ساعة عن يوم القيامة ، ليه ؟

لأن يا جماعة الناس محتاجة ، الناس بتقول لك أنا هاموت ، بس مافيش حد في دماغه ، الناس عايزه قدام عينها كدة  
 يتحفر قدام عينها منظره و هو مكفن و بيندفن في القبر ، طول ما المنظر ده قدامه هيزهد في الدنيا ، و طول ما  
 المنظر ده قدامه هيخاف من ربنا و هيزهد في الدنيا الحقيرة الزائلة دى ، عايزين دايما الموت ده يبقى قدام عينينا ،  
 عشان كدة من الحاجات الجميلة و الله يا جماعة اشترى كفن و حطه في الدولاب بتاعك ، كل ما تيجي تفتح

الدولاب تيجب قميص و لا تيجب بنطلون تشوف كفنك ، ليه ؟ اعملها بس و شوف قلبك هيبقى شكله إيه ، حط  
 الموت قدام عينيك ، لأن فعلا اخطر حاجة بتقلب كيان الإنسان إنه يفضل فاكر الموت

"وَلَقَدْ خَلَقْنَا فَوْقَكُمْ سَبْعَ طَرَائِقَ وَمَا كُنَّا عَنِ الْخَلْقِ غَافِلِينَ" المؤمنون: ١٧ فوقكم يعنى السبع سماوات ممكن يقعوا

عليك لو ربنا غضب عليك

طب ربنا بيهددنا ليه في وسط آيات النعم ؟ كأن ربنا يقول لك لا تفكر إن النعم دى مالهش ثمن و مالهش مقابل ، النعم دى أنا ممكن اسحبها منك ، شوف ربنا يقول "وَأَنْزَلْنَا مِنَ السَّمَاءِ مَاءً بِقَدَرٍ فَأَسْكَنَاهُ فِي الْأَرْضِ وَإِنَّا عَلَىٰ ذَهَابٍ بِهِ لَقَادِرُونَ" المؤمنون: ١٨ أنا ممكن اسحب النعم دى كلها منكم ، أنا ممكن أطلعك جنين مشوه ، أنا ممكن اعمل فيك أى حاجة ، يبقى افكروا إن النعم دى عشان تقبل عليها و تشكرها مش عشان تعصاني بيها ، يبقى الشوط الأولاني شوط النعم و لكن زى الجو العام للسورة فيه ترهيب في النص يا جماعة

### الأول ... العبادة

بعد كدة "وَلَقَدْ أَرْسَلْنَا نُوحًا إِلَىٰ قَوْمِهِ" المؤمنون: ٢٣ "أَنِ اعْبُدُوا اللَّهَ" المؤمنون: ٣٢ أول كلمه الإنبياء قالوها لقومهم إيه ؟ اعبدوا الله ، العبادة ، مش الشوط كله بيتكلم عن العبادة ؟ أول كلمه العبادة و أول أمر ربنا أمر بيه المؤمنين في القرآن كله "يَا أَيُّهَا النَّاسُ اعْبُدُوا رَبَّكُمُ" البقرة: ٢١ العبادة الأول ، أول حاجة العبادة "وَلَقَدْ أَرْسَلْنَا نُوحًا إِلَىٰ قَوْمِهِ" المؤمنون: ٢٣ "أَنِ اعْبُدُوا اللَّهَ مَا لَكُمْ مِنْ إِلَهٍ غَيْرُهُ أَفَلَا تَتَّقُونَ" المؤمنون: ٣٢ شوفوا ما هو إحنا كلمنا الناس عن النعم ، انت فكرك إن هما مش هيردوا عليك ؟ هيبدأ الجدل ، فبدأ ثلاث صفحات شوط الإنبياء يقولوا لقومهم نفس الكلام و قومهم بيجادلوهم و بيردوا عليهم

### الفكرة الأساسية في الجدل هي إيه ؟

فيه فكرة يا جماعة عشان نفهم أهل الباطل بيحاربوا الحق إزاي ، إزاي بيحاربوا الحق ، يقولوا لسيدنا نوح إيه ؟ "مَا لَكُمْ مِنْ إِلَهٍ غَيْرُهُ أَفَلَا تَتَّقُونَ فَقَالَ الْمَلَأُ الَّذِينَ كَفَرُوا مِنْ قَوْمِهِ مَا هَذَا إِلَّا بَشَرٌ مِثْلُكُمْ يُرِيدُ أَنْ يَتَفَضَّلَ عَلَيْكُمْ" المؤمنون: ٢٣ : ٢٤ ده عايز يتكبر عليك ، ده له مآرب خبيثة من وراء الدعوة دى ، هو الكلام بتاعه حتى لو جميل بس خذوا بالكوا من المآرب الخبيثة بتاعته ، ده دول طلاب سلطة ، ده دول طلاب فلوس ، ده دول طلاب لما ناس حوالهم ، يبقى يريد أن يتفضل عليكم ، إحنا ما سمعناش الكلام ده قبل كدة ، شوفوا الآية اللي بعدها "إِنَّهُ هُوَ إِلَٰهٌ رَجُلٌ بِهِ جَنَّةٌ" المؤمنون: ٢٥ ده مخه فيه حاجة ، ده حتى سلوكياته مش سويه ، ده حتى ماهواش منضبط ، ده حتى لما تشوفوه في الشغل بتاعه تحس إن هو بيعمل ... ، و أصحابه يقولوا عليه كذا و الناس اللي يعرفوه قالوا عليه كذا ، ده حتى شخصيته قبل مايلتزم كان شخصية مريبة كدة ، هو من قبل ما يلتزموا الناس دول و هما ناس بيحبوا الدنيا و ناس غير منضبتين فهما لقوا الدين هيققق لهم مآربهم فدخلوا نطوا على مقاصدهم من خلال إيه ؟ من خلال المرجحة بتاعه الدين هي اللي تنططهم عليه ، هو إيه ده يا جماعة ؟! انتو تلاحظوا إن هما ما بيهدموش في الدين ، ده بيهدموا... ، ما بيهدموش في الدعوة ، ده بيهدموا في الداعية ، اصل ما يعرفوش يهدموا في الدعوة هيهدموه في إيه ؟ أبو سفيان لما هرقل قال له بيدعوكوا لإيه ؟ بيدعونا لصلوة الرحم ، و بيدعونا ل ... هيقول إيه ؟! ما هو بيدعونا للأخلاق ، و بيدعونا للإيمان و بيدعونا للعبادة و بيدعونا للحب ، هيهدموا في الدين إزاي ؟ انت المدخل بتاع هدم الدين

## انت اللي ممكن يتهدم الدين من خلالك ، إزاي ؟

يا إما يفتنوك بالشهوات تبقى إنسان غير ملتزم ، يا إما يستغلوا أخطاءك لو انت ملتزم أو بتشتغل للدين و ينشروها في الصحف و المجلات و الفضائيات والإذاعات و كل حاجة عشان يقولوا شوفوا اهو ده الدين بتاعهم ه أو شوفوا اهو حتى لو ... ، هو الكلام جميل ، ده الإسلام عظيم ، بس مش دول هما المسلمين ، مش دول ، ده الالتزام جميل ، بس مش هما دول هما الملتزمين ، يبقى هدمك ، يبقى عليه العوض خلاص يبقى هدم الدين بطريقه ذكية ، ربنا في الجدل بتاعهم بين لك إن خد بالك إن مدخلهم لهدم الدعوة هو الداعية

طب لما ربنا علمنا إن إحنا نرد ، ما إحنا هنرد طبعاً إحنا هنسكت ؟ ما هما هيقولوا كلمة هنرد بعشرة "اعْمَلُوا عَلَىٰ مَكَاتِبِكُمْ إِنَّا عَامِلُونَ" هود: ١٢١ و إحنا هنسكت عشان ديننا ؟ ده أغلى حاجة عندنا ، شوف ربنا بيقول إيه بعد شوط الجدل بتاعهم بيعلمنا نرد عليهم إزاي "وَأَنَّ هَذِهِ أُمَّتُكُمْ أُمَّةً وَاحِدَةً" المؤمنون: ٥٢ آخر الشوط بتاع الأنبياء "وَأَنَا رَبُّكُمْ فَاتَّقُونِ \* فَتَقَطُّ أَمْرُهُمْ بَيْنَهُمْ زُبُرًا" المؤمنون: ٥٢: ٥٣ قصاد الوحدة بقت التقطع "كُلُّ حِزْبٍ بِمَا لَدَيْهِمْ فَرِحُونَ" المؤمنون: ٥٣ قصاد الخوف و الخشية من الله ، قصاد التقوى الفرح بالمعاصي "أَيَحْسَبُونَ أَنَّمَا نُمِدُّهُمْ بِهِ مِنْ مَّالٍ وَبَيْنٍ نُسَارِعُ لَهُمْ فِي الْخَيْرَاتِ بَلْ لَا يَشْعُرُونَ" المؤمنون: ٥٥: ٥٦ لا ده انتو مش عارفين "بَلْ قُلُوبُهُمْ فِي غَمْرَةٍ مِنْ هَذَا وَلَهُمْ أَعْمَالٌ مِنْ دُونِ ذَلِكَ هُمْ لَهَا عَامِلُونَ حَتَّىٰ إِذَا أَخَذْنَا مُتْرَفِيهِمْ بِالْعَذَابِ إِذَا هُمْ يَجَارُونَ لَا تَجَارُوا الْيَوْمَ إِنَّا نَكُونُ مِنْكُمْ مِمَّنْ لَا تُنصَرُونَ قَدْ كَانَتْ آيَاتِي تُنلَىٰ عَلَيْكُمْ" المؤمنون: ٦٣: ٦٦ إيه ده يا جماعة ؟ ده الآيات اللي بعدها شوفوا آدى آيات اهو ، ربنا بيقول لهم هيحصل فيكوا إيه عاقبة التكذيب ، اللي بيكذب بالدعوة دى بيحصل فيه إيه ، الأول هما شتموا في الداعية قبل الدعوة ربنا رد على الدعوة قبل الداعية ، أوعى تستدرج ، أوعى شيمته فيك تخليك ترد عن نفسك "لَا يَجْرِمَنَّكُمْ شِقَاقِي أَنْ يُصَيِّبَكُمْ" هود: ٨٩ يا عم اكرهوني ، يا عم أنا إنسان وحش بس هتروحوا جهنم لو ما سمعتوش الكلام ده ، هتضيعوا الجنة لو ما سمعتوش الكلام ده ، بس عمركو هيروح هدر لو ما سمعتوش الكلام ده ، بس هينكل بيكوا في الدنيا قبل الآخرة لو ما سمعتوش الكلام ده ، وخدين بالكوا من الفكرة يا جماعة ؟ وخدين بالكوا من الفهم اللي إحنا بنستقيه من القرآن في فن الدعوة وفن الجدل ؟ أنا وحش يا سيدي ، يا عم لما أصحابك يقولوا لك انت وحش و انت ... ، يا عم أنا وحش تودوا نفسكو جهنم !!! يا عم أنا هاروح الله أعلم ربنا هيوديني فين ، انت تودي نفسك النار ليه ؟ يبقى الرد على الدعوة ، أولاً : ما تستدرجش ما تردش عن نفسك

## الرد عن الداعية

ثم الداعية "أَفَلَمْ يَدَّبَّرُوا الْقَوْلَ" المؤمنون: ٦٨ "أَمْ لَمْ يَعْرِفُوا رَسُولَهُمْ" المؤمنون: ٦٩ "أَمْ يَقُولُونَ بِهِ جِنَّةٌ" المؤمنون: ٧٠ انتو ما سمعتوش اللي بيقوله ؟! انتو صم ما بتسمعوش ؟! انتو مش عارفينه ؟! انتو ما بتشفوش ؟! انتو مش شايفين النور اللي على وشه ؟! مش شايفين الصدق اللي في كلامه و الصدق اللي في ملامحه ؟! هذا الوجه ليس بوجه كذاب ، النور اللي على وشه "أَمْ يَقُولُونَ بِهِ جِنَّةٌ" المؤمنون: ٧٠ انتو بتقولوا عليه مجنون إزاي ؟ "أَمْ تَسْأَلُهُمْ خَرْجًا" المؤمنون: ٧٢ هو انت طلبت منهم دنيا ؟ لازم الداعية يا جماعة لا يطلب الدنيا على الإطلاق من وراء دعوته ، ربنا

رد على الداعية بعدما رد على الدعوة ، آه يبقى عكس اللي هما عملوه معنا ، ليه ؟ عشان نتعلم إزاي نرد على من يجادل

**الله و الدار الآخرة ... ليه ؟**

بعد كدة ، هي مشكلة الناس دى إيه جدل فعلا ؟ لأ ، مشكله الناس إن قلبها مقفول ، يبقى إذا البيان الحتامى في الصورة ثلاث صفحات الله و الدار الآخرة ، طرقات عن نعم الله ، طرقات عن آيات الله ، طلاقات من مدافع الدار الآخرة على قلوبهم

عشان ربنا يعلمنا ، افهم إزاي تفتح قلب اللي قدامك ، لازم يبقى المعاني دى في قلوبنا و في نفس الوقت لازم نعرف نتكلم عن الله وعن الدار الآخرة لأن هو ده اللي يفرق الداعية عن داعية ، هو ده اللي يفرق أخ أصحابه التزموا على يديه من واحد تاني قاعد يكلمهم و أصحابه ما التزموش عن يديه ، لأن ده فعلا عارف يتكلم عن ربنا و ده مش عارف يتكلم عن ربنا ، مش عارف ، هو ده بيقراً و ده بيسمع ، و لكن ده اهو أى كلمة تيجي في دماغه و خلاص ، عشان كدة يا جماعة الشوط الأخراني عن الله و الآخرة ، ده شوط الدعوة ، يبقى إذا بدأناها كلمناهم عن النعم جادلونا و شتموا في الدعاة قبل الدعوة فقمنا إحنا ردنا عن الدعوة قبل الدعاة ، و بعد كدة في الآخر طلاقات عن الله و الدار الآخرة

**يبقى سورة المؤمنون اترتبت ، إزاي ؟**

إن الأول صفات الدين و بعد كدة كلام الدين ، كأن ربنا بيعلمنا إزاي نبقي دعاة ناجحين ، أول حاجة النموذج ثم يبيجي الشوط الأخراني اللي إحنا أتكلمنا عنه اللي هو شوط الله و الدار الآخرة

**"وَهُوَ الَّذِي أَنشَأَ لَكُمُ السَّمْعَ وَالْأَبْصَارَ وَالْأَفْئِدَةَ قَلِيلًا مَّا تَشْكُرُونَ" المؤمنون: ٧٨** تخيل لو انت كنت عايش ما

بتسمعش و ما بتشوفش و ما بتتكلمش تخيل كانت هيبقى شكلها إيه ؟ شوف نعم ربنا **"وَهُوَ الَّذِي ذَرَأَكُمْ فِي**

**الْأَرْضِ" المؤمنون: ٧٩** مين اللي جابك هنا ؟ **"وَالِيهِ تُخْشَرُونَ" المؤمنون: ٧٩** شوف ربنا و شوف نعم ربنا **"قُلْ لِمَنِ**

**الْأَرْضُ وَمَنْ فِيهَا إِنْ كُنْتُمْ تَعْلَمُونَ" المؤمنون: ٨٤** الأرض دى بتاعه مين ؟ **"سَيَقُولُونَ لِلَّهِ" المؤمنون: ٨٥** بتاعة ربنا

طب اطلع معاهم من الأرض **"قُلْ مَنْ رَبُّ السَّمَاوَاتِ السَّبْعِ وَرَبُّ الْعَرْشِ الْعَظِيمِ سَيَقُولُونَ لِلَّهِ" المؤمنون: ٨٦: ٨٧**

طب اطلع معاهم **"قُلْ مَنْ بِيَدِهِ مَلَكُوتُ كُلِّ شَيْءٍ وَهُوَ يُجِيرُ وَلَا يُجَارُ عَلَيْهِ إِنْ كُنْتُمْ تَعْلَمُونَ" المؤمنون: ٨٨** سيقولون

الله ، فكرهم رجهم بأنك تحسسهم عظمة ربنا أد إيه ، فكرهم بعظمة ربنا في الأرض ، وبعده كدة عظمة ربنا في

السموات ، و بعد كدة عظمة ربنا في العرش اللي أعظم من الأرض و السموات ، و بعد كدة كل ده خلق ،

فكرهم بعظمة ربنا في الأمر و في ملك الأمر لعل قلوبهم تلين ، لسه ملنتش برضه ؟ هد قلوبهم بالآخرة **"حَتَّىٰ إِذَا**

**جَاءَ أَحَدَهُمُ الْمَوْتُ" المؤمنون: ٩٩** سلسله الدار الآخرة ورا بعضها اهو يا جماعة ، أول حاجة الموت **"حَتَّىٰ إِذَا جَاءَ**

**أَحَدَهُمُ الْمَوْتُ قَالَ رَبِّ ارْجِعُونِ" المؤمنون: ٩٩** **"ارْجِعُونِ" صيغة الجمع** أهى يعنى بيتوسل بتعظيم الله ، يا رب

رجعني يا رب **"كَلَّا" الكلمة بتنفجر فوقهم كالقنبلة و هو محفور في تابوت القبر و محبوس فيه**

**"كَلَّا ۚ إِنَّهَا كَلِمَةٌ هُوَ قَائِلُهَا" المؤمنون: ١٠٠** لن تقبل التوبة في هذه اللحظة أبدا ، توبة بعد فوات الأوان **"وَمِنْ**

**وَرَأَيْتَهُمْ يَرْزَخُ إِلَىٰ يَوْمٍ يُبْعَثُونَ" المؤمنون: ١٠٠** محطوط في الحبسة دى ليوم القيامة لا تعرف ترجع و لا تعرف تطلع



**"فَإِذَا نُفِخَ فِي الصُّورِ" المؤمنون: ١٠١** المشهد الثاني من مشاهد القيامة ، الحلقة الثانية من حلقات الدار الآخرة يوم القيامة بقى بعد الموت يوم القيامة **"فَإِذَا نُفِخَ فِي الصُّورِ فَلَا أَنْسَابَ بَيْنَهُمْ يَوْمَئِذٍ وَلَا يَتَسَاءَلُونَ"** المؤمنون: ١٠١ لا يتساءلون فيه ؟ من الدهول اللي هما فيه مش عارفين يتكلموا ، مش عارفين ينطقوا ، مش عارفين يسألوا عن إيه ، من الدهول اللي هما شافوه ، من التعذيب اللي هما شايفينه قدام عينهم يبسجر من اجلهم **"فَمَنْ ثَقَلَتْ مَوَازِينُهُ"** المؤمنون: ١٠٢ ده إحنا دخلنا في مشاهد القيامة بعد مشهد البعث مشاهد القيامة و الميزان بيتوزنوا فيه ، و ربنا قال **"فَمَنْ ثَقَلَتْ مَوَازِينُهُ"** المؤمنون: ١٠٢ مش ميزانه ، ميزان هيتوزن فيه عملك و حسناتك و سيئاتك ، و ميزان هيتوزن فيه قلبك ، زى حديث البطاقة اللي الراجل قال لا إله إلا الله بيقين طيشت ٩٩ صحيفة سيئات ، انت اليقين بتاعك و المقامات اللي في قلبك تطيش كام صحيفة سيئات ؟ يتوزن قلبك و يتوزن كمان جوارحك لساق عبد الله بن مسعود في الميزان أثقل عند الله من جبل أحد ، ايدك دى أطعت ربنا بيها أد إيه ؟ لسانك ده أتكلمت بيه عن ربنا أد إيه ؟ عينيك دى بكيت فيها من خشية الله أد إيه ؟ ودنك دى سمعت بيها قرآن أد إيه ؟ جسمك ده خدمت بيه ربنا و دين ربنا قد إيه ؟ أرهقت و تعبت أد إيه عشان ربنا ؟ سمعت من أحد الدعاة مرة و هو بيتكلم بيقول لي أنا باجى أحيانا آخر اليوم مش قادر بوقي بيوجعني ، لسان بيوجعني ، يعني تحيلوا مرة حسيت بيها قبل كدة دى ؟ إن لسانك من كثر الكلام عن ربنا و دين ربنا وجعك ؟ انت تساوى أد إيه عند ربنا ؟ يبقى **"فَمَنْ ثَقَلَتْ مَوَازِينُهُ"** المؤمنون: ١٠٢ تساوى أد إيه ؟ **"فَأُولَئِكَ هُمُ الْمُفْلِحُونَ"** و **"وَمَنْ خَفَّتْ مَوَازِينُهُ فَأُولَئِكَ الَّذِينَ خَسِرُوا أَنْفُسَهُمْ فِي جَهَنَّمَ خَالِدُونَ"** المؤمنون: ١٠٢ : ١٠٣ دخلنا في الحلقة اللي بعدها النار **"تَلْفَحُ وَجُوهُهُمُ النَّارُ وَهُمْ فِيهَا كَالِحُونَ"** المؤمنون: ١٠٤ بيقد يتلفح وشه ، وشه ده اقرب حاجة يتلفح بالنار لغاية ما يتكلح ، لغاية ما يبقى شكله مشوة لدرجة إن النظر إلي وشه يبقى عذاب بعد كدة الحلقة اللي بعد كدة التبكيت النفسي و الإلام النفسي بعد الإلام المادي **"أَلَمْ تَكُنْ آيَاتِي تُتْلَىٰ عَلَيْكُمْ"** المؤمنون: ١٠٥ مش كنتوا بتسمعوا ؟ مش كان فيه ناس قاعدة تدى و تتكلم عن ربنا ، وكان القرآن نازل لكوا و إذاعة القرآن الكريم مشغله القرآن و البرامج الدينية ٢٤ ساعة ؟ **"أَلَمْ تَكُنْ آيَاتِي تُتْلَىٰ عَلَيْكُمْ فَكُنْتُمْ بِهَا تُكَذِّبُونَ"** المؤمنون: ١٠٥ مش كنتوا بتسمعوا ؟ **"قَالُوا رَبَّنَا غَلَبَتْ عَلَيْنَا شِقْوَتُنَا وَكُنَّا قَوْمًا ضَالِّينَ"** المؤمنون: ١٠٦ يعني إيه يا جماعة ؟ إما معناها قضاء و قدر يا رب ، انت اللي كتبت عليهم ، حكمت عليهم **"اخْسَرُوا فِيهَا وَلَا تُكَلِّمُونِ إِنَّهُ كَانَ فَرِيقٌ مِّنْ عِبَادِي يَقُولُونَ رَبَّنَا آمَنَّا فَاغْفِرْ لَنَا"** المؤمنون: ١٠٨ : ١٠٩ إشمعي دول ؟ إشمعي دول ما غلبتش عليهم شوقهم ؟ لأ ده انتو اللي كنتوا ضلال ، ده انتو اللي كنتوا أهل زبغ ، خذوا بالكوا يا جماعة ربنا لما بيحاج الكفار يوم القيامة بيحاجهم بأهل الدين و الإيمان كأنه بيقول لهم كانوا قدامكوا أهو ما عملتوش زبهم ليه ؟ ما مشيتوش وراهم ليه ؟ أنا عايزك تتخيل لو ربنا جاب بتوع أوروبا يوم القيامة و قال لهم كفرتوا ليه ؟ هيحجب المسلمين وكأنه يقول لهم ما كانوا قدامكوا أهو ، والا هيقلولوا له يا رب ده دول اللي كرهونا في الإسلام ، ده دول اللي خرجونا من الإسلام ، ده دول اللي شوها صورة الإسلام ، الله أنزلنا إلى الأرض لكي نكون حجة الله على خلقه ، فإذا نحن حجة للخلق على الله سبحانه و تعالى ، شوفوا يا جماعة إحنا الوقتي حجه لله على الناس ولا حجه للناس على الله ؟

إحنا بننفر الناس من الدين و لا إحنا بنقدم للناس نموذج يبهر الناس بالدين و بيعرف الناس عظمه الدين ؟ إحنا إيه من الاثنين ؟

**"غَلَبَتْ عَلَيْنَا شِقْوَتُنَا"** المؤمنون: ١٠٦ ممكن معنى غلبت علينا شقوتنا برضه ، يا رب شهواتنا هزمتنا يا رب ، ضَعَفْنَا ، أَهْزَمْنَا قدام شهواتنا و رغباتنا و نزواتنا يا رب ، أَهْزَمْتَ قدامها ليه ؟ ان الدين سهل و ناس ما اهزمتمش اهي قدام شهواتها و تحتتم السورة على **"وَقُلْ رَبِّ اغْفِرْ وَارْحَمْ وَأَنْتَ خَيْرُ الرَّاحِمِينَ"** المؤمنون: ١١٨ لا تفتكروا إن العذاب اللي أنا باقول لكم عليه ده انتو بمعزل عنه و الا ممكن ما تتعذبوش بيه أبدا ، لما جبريل و ميكائيل خافوا من ربنا بعد طرد إبليس فقال لهما الله سبحانه و تعالى في الأثر الإسرائيلي لماذا ؟ قالوا يا رب نخاف أن يحدث معنا كما حدث معه قال الله فهكذا فكونا خليكوا كدة ، لازم تفضل خايف ، الكلمة اللي إحنا بنكرها كثير **"وَأَتَّقُوا النَّارَ الَّتِي أُعِدَّتْ لِلْكَافِرِينَ"** آل عمران: ١٣١ اوعى تفتكر إنها مدام للكافرين و لا أول الآية **"إِنَّ الَّذِينَ كَفَرُوا بِآيَاتِنَا سَوْفَ نُصْلِيهِمْ نَارًا"** النساء: ٥٦ لا يا حبيبي انت نفسك مخاطب بنفس الكلام و ممكن تواجه نفس الكلام ، و لازم يمتلئ قلبك بالخوف من الله حتى يؤمنك الله في الآخرة ، و لازم تبقى نموذج عشان الدين ينتصر يا جماعة ، الدين مش هينتصر إلا لو النموذج قام يا جماعة ، الدين مش هينتصر و لا هينتشر و لا هيقوم إلا لو بقى فيه نموذج العالم كله لما يشوفه ينبهر بيه ، و يبقى ملتزمين نموذج لما يشوفه غير الملتزمين ينبهروا بيه ، و يبقى الدعاة نموذج الإخوة لما تشوفه تنبهر بيه ، لما نبقي إحنا نموذج فعلا الناس كلها تتأثر بيها

**"كَزَّرِعْ أَخْرَجَ شَطْنَهُ"** الفتح: ٢٩ زى زرع زى ساق خرجت الفروع بتاعتها ، إحنا الساق و الناس اللي بره الفروع ، لما تلاقى الفروع مسوسة اعرف إن الساق مسوسة ، يبقى إحنا عايزين نبقي ساق سليمة عشان أى حد يطلع مننا و أى حد يشوفنا فعلا يبقى نموذج ، و ينضم إلى النموذج اللي ببرز عظمه دين الله سبحانه و تعالى

### سورة النور

السورة الثانية اللي عايزين نتكلم عنها بعد سورة المؤمنون سورة الـ إيه ؟ سورة النور ، سورة النور سورة خطيرة جدا ، حتى من اسمها كدة ، اسمها النور ، تخيلوا ، لما ربنا يسمي سورة النور ، كأن دى اللي ها تنور لك طريقك يعنى كأن ربنا من أولها بيقول لك السورة دى خطيرة جدا ، يسميها لك النور عشان يعرف لك إنها هتنور لك طريقك ، و في نفس الوقت يحط لك قبلها سور مكية و بعدها سور مكية و هي مدينة عشان تدخل و انت قلبك مشحون بالإيمان فيها في آيات الجنة و النار فتقدر تنفذ الأحكام اللي فيها ، عشان تقدر تنفذها ، و في نفس الوقت يدخل لك دخلة غريبة جدا ، سورة النور ما فيش أولها "الم" ولا "كهيعص" ولا... ، ما فيش فيها مقدمات على طول **"سُورَةٌ أَنْزَلْنَاهَا وَفَرَضْنَاهَا \* الزَّانِيَةُ وَالزَّانِي"** النور: ٢ ليه ؟ لما أجيلك بيتك ، بأقول لك إيه ده كذا حصل طب اقعد بس أجيب لك حاجة ساقعة ، ما فيش وقت الموضوع خطير اهو السورة بتقول لك الموضوع خطير و في نفس الوقت المقدمة بتاعتها بتقول لك دا مرسوم ملكي نازل من الملك اسمع **"سُورَةٌ أَنْزَلْنَاهَا"** النور: ١ مين اللي نزل دى ؟ الملك ، أنا اللي نزلتها ما حدش ييجي يقول ده أنا كنت باحسبها واحد تاني اللي قالها

**"وَفَرَضْنَاهَا"** النور: ١ يعنى خذوا بالكوا كل اللي في السورة دى فرض عليكم ، ما حدش ييجي يقول يا رب ده كنت باحسبها سنة **"وَأَنْزَلْنَا فِيهَا آيَاتٍ بَيِّنَاتٍ"** النور: ١ كلها واضحة ما حدش ييجي يقول لي يوم القيامة ما كنتش

عارف يا رب و ما كنتش فاهم يا رب ، مرسوم ملكي من أول السورة ما حدث له حجه في عدم الاستفادة و عدم إتباع أوامر هذه السورة

### سورة النور... اسمها النور... ليه ؟

بتنور لنا حياتنا يا جماعة ، إزاي ؟ سورة النور بتكلمنا ، بتنور لنا قلبنا بالإيمان و بتنور لنا عقلنا بالـ إيه ؟ بالفهم ، يبقى الحاجة الجديدة اللي في سورة النور اللي إحنا لازم نستفيد منها منها الفهم ، النور لما ييجي ، إزاي المجتمع بتاع المدينة قعد شهر كامل يلف حوالين نفسه بسبب كلمة قالها عبد الله ابن أبي ابن سلول اقم فيها شرف السيدة عائشة ، إزاي ؟ إزاي المجتمع يلف حوالين نفسه ؟ كان قدامكوا الطريق إنكوا تحموا المجتمع ، ما هو المنافقين عايزين الزنا ينتشر في المجتمع

" **إِنَّ الَّذِينَ يُجِبُونَ أَنْ تَشِيعَ الْفَاحِشَةُ فِي الَّذِينَ آمَنُوا** " النور: ١٩ ربنا نزل سورة النور عشان نفهم حاجتين مهمين أوى يا جماعة لو جم نور الفهم هيجي ، و عشان نور الإيمان ييجي نتكلم الأول عن نور الفهم ، إيه نور الفهم ؟ إزاي فهمنا ينور ؟

أول حاجة ربنا بيعلمنا إزاي نحصن المجتمع ، سورة النور بتعلمك ، بتوريك تشريع ربنا ده مُعجز أد إيه إزاي المجتمع يتحصن ؟ فيه جريمة زنا ، نعمل إيه في جريمة الزنا ؟ أنا عايزك تتخيل معايا ، يعنى أنا فكرت أجيب ورقة و ارسما بس يعنى إيه يعنى ما كانتش هاتبان قدام الجميع ، أنا عايزك تتخيل إن مسجد السلاب ده بيت ، و إن الناحية دى منه ثلاث أبواب فيها ثلاث شبابيك ، يعنى البيت ده كله مقفول بس فيه ثلاث شبابيك في ناحية واحدة ، البيت ده جواه واحدة ، يبقى البيت ده اهو جواه واحدة قاعدة اهي متمكيحة و متزوقه ده اللي واحدة قاعدة جواه ، و البيت ده مقفول من كل الجوانب ، بس فيه ثلاث شبابيك أو أربع شبابيك مفتوحين ، خلاص ؟ يبقى بيت جواه واحدة دا الملمح الأول ، الملمح الثاني فيه شبابيك الشبابيك دى واقف عليها ناس ثلاثة كل واحد طالع قرنين من رأسه ، معايا ؟ دول ها نعرف هما مين الوقتي ، و بره البيت ده حضرتك واقف ، انت واقف انت بره البيت ده يبقى في أربع ملامح في الصورة ، هما إيه الملامح دول ؟

البيت اللي جواه واحدة ده رمز الزنا ، اللي هو لو دخلت هنا خلاص الزنا حصل ، و الشبابيك دى المداخل اللي لو انت دخلت منها ها توصل للزنا و العياذ بالله ، السكك اللي بتؤدي إلى الزنا و اللي واقفين و لهم القرون دول ، دول الأعداء اللي قاعدين يخططوا عشان يخلو الشباب يقعوا في الزنا عشان الشباب تبوظ و الدين يضع ، و معادش يبقى فيه رجالة ، و اللي واقف بره ده انت اللي مطلوب إن الفتن دى كلها معمولة عشانك ، و اللي مطلوب منك من جوه تبقى محصن ، حتى لو الأبواب أفتحت و الشياطين دى كلها راحت و المرأة قالت لك هيت لك برضه ما تقعش في هذه الجريمة أبدا

السورة يا جماعة أول شوط فيها **"الزَّانِيَةُ وَالزَّانِي فَاجْلِدُوا كُلَّ وَاحِدٍ مِنْهُمَا مِائَةَ جَلْدَةٍ"** النور: ٢ يبقى إذا من ١ لـ ١١ ده الشوط الأول الإجراءات العقابية ضد جريمة الزنا ، ده رقم ١

**الشوط اللي بعد كدة "إِنَّ الَّذِينَ جَاءُوا بِالْإِفْكِ عُصْبَةٌ مِنْكُمْ"** النور: ١١ ربنا كلمنا عن المنافقين و عن الشيطان و خطوات الشيطان ، يبقى ثاني شوط الأعداء اللي عايزين يدخلوك عشان تزني و العياذ بالله

**الشوط الثالث اللي بعده:** "يَا أَيُّهَا الَّذِينَ آمَنُوا لَا تَدْخُلُوا بُيُوتًا غَيْرَ بُيُوتِكُمْ حَتَّى تَسْتَأْذِنُوا" النور: ٢٧ أدب

الإستئذان ووو ، ده الإجراءات الوقائية ، المداخل اللي لما بتغيب في المجتمع بيحصل إن الطرفين بيتقابلوا مع بعض بزينتهم يبدأ جريمة الزنا نوصل ليها و العياد بالله ، يبقى ده الإجراءات الوقائية ضد وقوع جريمة الزنا

بعد كدة "اللَّهُ نُورُ السَّمَاوَاتِ وَالْأَرْضِ مَثَلُ نُورِهِ" النور: ٣٥ اللي هو نور الإيمان "كَمِشْكَاةٌ فِيهَا مِصْبَاحٌ الْمِصْبَاحُ فِي رُجَاةٍ" النور: ٣٥ يبقى إذا ده نور الإيمان

**إيه العلاقة ما بين الأربع أشواط دول ؟**

**الشوط الأولاني:** اللي هو العلاج العقابي ، اللي هو اللي يوصل جوه هنا للبنت ده يحصل له إيه ، يبقى ده العلاج العقابي ، خذوا بالكوا ، اللي هيعمل الجريمة ده هيجصل فيه و هيجصل فيه ، ده رقم ١

**الشوط الثاني:** اللي هو بيبين لك الأعداء بتوعك ، ده معرفة الأعداء و معرفه أساليبهم إزاي بيشتيعوا الفاحشة في المجتمع ، ده الشوط الثاني

**الشوط الثالث:** الإجراءات الوقائية ، إزاي نقفل الشبابيك دى عشان ما ييقاش فيه مدخل الزنا يقع منه

**الشوط الرابع:** العلاج الجذري ، العلاج الإيماني العميق اللي ما فيش علاج أنجح منه و لا أقوى منه ، إزاي النفوس من جوه تبقى مع الله سبحانه و تعالى

شايفين اتلمت إزاي يا جماعة ؟ شايفين الشمولية ؟

**أول الشوط...الإجراء العقابي**

أول شوط بيكلمك يقول **"الزَّانِيَةُ وَالزَّانِي فَاجْلِدُوا"** النور: ٢ الزانية الأول ، هي السبب ، هي اللي فتحت الباب ، البنات هي اللي بتفتح الباب الأول عشان كدة هي اللي بتذكر الأول **"فَاجْلِدُوا كُلَّ وَاحِدٍ مِنْهُمَا مِائَةَ جَلْدَةٍ وَلَا تَأْخُذْكُمْ بِهِمَا رَأْفَةٌ"** النور: ٢ مش رأفة ، الرأفة اللي هي صفه الرأفة عموما ، الرأفة يعني لحظة رأفة ، لحظه واحدة بس ، ولا لحظة و لا جلدة في الـ ١٠٠ تأخذك بيه رأفة بواحد من الإثنين و إنت بتجلده

**"وَلَا تَأْخُذْكُمْ بِهِمَا رَأْفَةٌ فِي دِينِ اللَّهِ إِنْ كُنْتُمْ تُؤْمِنُونَ بِاللَّهِ وَالْيَوْمِ الْآخِرِ \* الزَّانِي لَا يَنْكِحُ إِلَّا زَانِيَةً أَوْ مُشْرِكَةً**

**وَالزَّانِيَةُ لَا يَنْكِحُهَا إِلَّا زَانٍ أَوْ مُشْرِكٌ"** النور: ٢: ٣ ربنا قرن ما بين الزاني و المشرک ليه ؟ أو ما بين الزانية و المشركة ليه ؟ لأن الشرك إن فيه حق لله أدبته لغير الله و هو العبادة ، الزنا إن فيه حق للزوج المرأة أدته لغير الزوج فالإثنين ربنا قرنهم مع بعض ، بعد كدة لو زوج دخل لقي مراته و العياد بالله بتزني أو...أو... ، بيحصل عملية التلاعن ، ربنا قال لك إن هي تقسم أربع مرات إن هي صادقة و الخامسة تقول إيه ؟ عليا غضب الله و العياد بالله ، عليها غضب الله و لا عليها لعنة الله لو كانت كدابة ؟ عليها غضب الله لو كانت كدابة ، طب هو يحلف أربع مرات إن هي كدابة و الخامسة عليه لعنة و لا الغضب ؟ اللعنة ، طب ليه هو لو افترى عليها يبقى ملعون يا جماعة ؟ لأن انتو عارفين المرأة اللي زوجها بيفترى عليها ده معناها إيه ؟ معناها إن بتتطرد من رحمه المجتمع ، الناس يعني لو حد يعرف حادثه من هذه الحوادث المرأة بتت عزل عن المجتمع خلاص ما عايش حد بيكلمها و لا حد له دعوة بيها

ولا...ولا...ولا... ، اللي بيفترى على زوجته حتى لو كذاب و العياد بالله للأسف في مجتمع عدم التثبيت اللي إحنا عايشين فيه ، يبقى زى ما طردها من رحمه المجتمع يتطرد من رحمه الله اللي هي اللعنة

طب و هي ليه تهدد بالغضب ؟ الغضب ده ، أنا لما اغضب عليك و لله المثل الأعلى ، خلاص ، ده مغضوب يبقى خلاص استني لكمية ، استني خبطة ، استني ركلة ، خلاص هتتضرب خلاص ، اهو يبقى الغضب ده هو مقدمه العقاب ، يبقى تهديد بالعقاب بتاع الدنيا كأن ربنا هدده بالطرد من الرحمة دنيا و آخرة ، و هددها بعقوبة الدنيا قبل الآخرة عشان يبقى كل واحد جزاءه من جنس العمل ، يبقى ده الشوط الأول كأن ربنا يقول لك ، هيحصل لك ده لو انت إيه ؟ دخلت جوه

الشوط الثاني: مين أعدائنا يا جماعة ؟ ... ثلاث أعداء

العدو الأول : المنافقين

"إِنَّ الَّذِينَ جَاءُوا بِالْإِفْكِ عُصْبَةٌ مِنْكُمْ" النور: ١١ اللي هما مين ؟ المنافقين ، اللي ربنا قال في الآخر "إِنَّ الَّذِينَ يُحِبُّونَ أَنْ تَشِيعَ الْفَاحِشَةُ" النور: ١٩ عايزينها تشيع ، تلاقي الجرايد الصفراء بتاعتهم ، و الجرايد بتاعتهم لازم صور نساء ملياها و لازم صفحاها مليانه صور و العياذ بالله كلها بتشير الشهوات ، ليه ؟ هو عايز الفاحشة تشيع و يعمل شيخ و يلبس لك لبس الشيوخ ، و يقول لك ده للأسف ده عملوا إحصائية وسط شباب الجامعة لقوا إن ٩٥% من شباب الجامعة وقعوا في الزنا و هو ولا ٩٥% و لا حتى ٥% و لا ٥% ما إحنا عارفين الشباب و عارفين و محتكين بالشباب و لا ٥% ، امال هو بيحجب الإحصائيات دى ليه ؟ اللي للأسف بعضنا بيحجبها و يقولها في الدروس بتاعته ، ليه بيحجب الإحصائيات دى ؟ عشان يحسس الشباب إن ما فيش أمل ، عشان الثابت اللي بيدعوا إلى الله يقول ما فيش أمل يحبط و يقعد في بيته ، و عشان المتذبذب اللي مش عارف يقع و الا لأ يقول لك ما هي ضايعة ضايعة و كلوا ضايع اشمعى أنا ، يقع ، و عشان الضايع اللي بيوقع فيها يقول لك كله كذا الحمد لله مش أنا لوحدي و يثبت شايفين الفكر بتاعهم ؟ يعنى لدرجة إن هو يعمل إنه بيتعثر على الدين عشان يضيع الدين و العياذ بالله

العدو الثاني: الشيطان

"يَا أَيُّهَا الَّذِينَ آمَنُوا لَا تَتَّبِعُوا خُطُواتِ الشَّيْطَانِ" النور: ٢١ تاني عدو ليك الشيطان ، المنافقين قبل الشيطان ؟ أه ، المنافقين قبل الشيطان ، تاني عدو ليك الشيطان ، و ربنا قال خطوات ، واحدة واحدة ، طب بس بص ، طب بس اقف ، طب بس إتمشي ، طب بس كلمها ، و العياذ بالله تلاقي آخرة الموضوع زنا و العياذ بالله ، خطوات الشيطان يوقعك واحدة واحدة ما يجيبكش مره واحده أبدا عشان ما يصطدمش بيك ، الشيطان عنده فقه تغيير يا جماعة ! الشيطان عنده فن دعوة عالي قوى ! بيعرف إزاي يستدرجك واحده واحدة ! يبقى تاني واحده الشيطان

ثالث واحدة: النفس

"وَلَا يَأْتَلِ أُولُو الْفَضْلِ مِنْكُمْ وَالسَّعَةِ أَنْ يُؤْتُوا أُولِي الْقُرْبَىٰ وَالْمَسَاكِينَ وَالْمُهَاجِرِينَ فِي سَبِيلِ اللَّهِ" النور: ٢٢ لما واحد اتكلم على بنت سيدنا أبو بكر ، اتكلم على السيدة عائشة ، فسيدنا أبو بكر كان بيديه في حادثه الإفك ، كان بيديه معونة ، قطع معونته ، كأن ربنا قال له لا ما تقطعهاش ، ده اتكلم عن بنتي ، ما تقطعهاش ليه يا جماعة ؟ دوس على نفسك عشان ربنا ، يبقى ثالث حاجة بتقف بينك و بين ربنا النفس ، ثالث حاجة بتسول لك المعصية النفس ، ثالث عدو ليك النفس



ربنا جاب لنا الثلاث أعداء: المنافقين و الشيطان و إلـ إيه ؟ و النفس ، الثلاث أعداء اللي انت يجب انك تحذر منهم و الوسيلة بتاعه كل واحد إيه ؟ **المنافقين**: إزاي هيشيعوا الفاحشة ؟ بالأسلوب اللي إحنا قلناه ، طب **الشيطان**: خطوات واحدة واحدة ، طب **نفسك**: ده هو اللي ظلمي ، تقعد تبرر لك و تديك أعدار ، دوس عليها بالجزمة و قول اغفر للناس عشان ربنا يغفر لي

### الشوط الثالث... الإجراءات الوقائية

**"يَا أَيُّهَا الَّذِينَ آمَنُوا لَا تَدْخُلُوا بُيُوتًا غَيْرَ بُيُوتِكُمْ حَتَّى تَسْتَأْذِنُوا وَتُسَلِّمُوا عَلَى أَهْلِهَا"** النور: ٢٧ مش دخول البيوت هجم كدة الوقتي يا جماعة ، الناس هي اللي عندها كدة عادى ، تدخل البيت تلاقي أخت صاحبك قاعدة في الإنترية ، انت يا بنتي بتعملي إيه يا بت ؟!! ما تحتجي على ماتقعدى ، عادى!!! و ده صاحبي بيكلم أختي إيه المشكلة ؟! ، السلوكيات دى هي اللي بتؤدى إلى الإنحراف ، أو لو دخلت فجأة هجم على البيت لقيت واحدة مثلا ، يبقى الحاجات دى هي اللي بتؤدى إلى الإنحراف طب بعد كدة

يبقى دى الإجراءات الوقائية أول حاجة آداب الاستئذان ربنا سماها الاستئناس ما تدخلش إلا لما تحس إن هما عايزينك تدخل فعلا ، يعنى اخرج لك أنا و أقول لك آه سلام عليكم ازيك ، يبقى مش عاوزك تدخل ، يبقى ما تدخلش ، ممكن في جوه أي حاجة ، في جوه أي ظروف ، ما ، ما تدخلش ، يبقى آداب الاستئذان ، بعد كدة **"قُلْ لِلْمُؤْمِنِينَ يَغُضُّوا مِنْ أَبْصَارِهِمْ"** النور: ٣٠ غض البصر **"وَيَحْفَظُوا فُرُوجَهُمْ"** النور: ٣٠ هنا حفظ الفرج يا جماعة مش معناه عدم الوقوع في الزنا بس ، يا جماعة ده إجراءات وقائية ، يا جماعة أساسا العادة السرية و ما شابهها ، حفظ الفرج هنا الحاجات الوقائية

**"وَقُلْ لِلْمُؤْمِنَاتِ يَغْضُضْنَ مِنْ أَبْصَارِهِنَّ"** النور: ٣١ الواحدة برضو تغض من بصرها ، و الأخوات اللي لابسين حمار و نقاب يغضوا من بصرهم ، ده لازم زيهم زى غيرهم في بعض النساء ، فاكربين إن هما عادى بالنسبة لهم و في بعض النساء و للأسف الشديد و هما بيدخلوا مساجد تلاقي عينيهم برضو ، ما ينفعش يا جماعة هذا الكلام ، ما ينفعش ... لأ... انت ملتزمة زيك الرجل بالضبط عليك تكليف غض البصر **"وَيَحْفَظْنَ فُرُوجَهُنَّ وَلَا يُبْدِينَ زِينَتَهُنَّ إِلَّا مَا ظَهَرَ مِنْهَا"** النور: ٣١ الحجاب الشرعي اللي من أخطر الحاجات الوقائية إيه الحجاب الشرعي يا عم الشيخ ؟

اللي ماتعرفيش منه أنت تحينة و لا رفيعة ، هو ده الحجاب الشرعي يا جماعة ، بس هي الكلمة اللي انت عايز تلم بيها كل الشوط الحجاب الشرعي ما تتعرفيش منه انت كبيره ، انت تحينه ، انت رفيعة ، هو الحجاب اللي ما يبينش هو ده الحجاب الشرعي ، شوفي هتسموه إيه أي اسم هيبقى ده الحجاب اللي ربنا نزله في القرآن ، الآية اللي كأن ربنا قال للمؤمنين خذوا بالكوا من فتنه النساء كانت سطر يا جماعة ، الآية اللي كأن ربنا قال للنساء فيها ياخذوا بالهم و ينضبوا كانت تسع سطور و نص ، كأن المرأة اخطر عشر مرات من الرجل في مثل هذه الفتنة ، المرأة خطر

عشان كدة ربنا في الآخر يقول **"وَتُوبُوا إِلَى اللَّهِ جَمِيعًا أَيُّهَ الْمُؤْمِنُونَ"** النور: ٣١ الآية الوحيدة اللي ربنا أمر فيها بالتوبة الجماعية ليه ؟ لأن الذنبن اللي مذكورين في السورة قبلها هما إيه ؟ البصر ، إطلاق البصر و حادثة الإفك

اللي هي الغيبة ، و ما فيش و لا واحد مننا موقعش في الاثنين دول ، ما فيش بنى آدم ما وقعش في الاثنين دول فرينا أمر بالتوبة الجماعية

"وَأَنكِحُوا الْأَيَامَىٰ مِنكُمْ وَالصَّالِحِينَ مِنْ عِبَادِكُمْ وَإِمَانِكُمْ" النور: ٣٢ الأيامي كل واحد مالوش زوج ، هو دا الأيم ، أي واحد مالوش زوج أيم ، يبقى تيسير الزواج "وَلَيْسَتَغْفِرَ الَّذِينَ لَا يَجِدُونَ نِكَاحًا" النور: ٣٣ العفاف "حَتَّىٰ يُغْنِيَهُمُ اللَّهُ مِنْ فَضْلِهِ" النور: ٣٣ يبقى مسألة العفاف و تحرير العبيد ، لأن العبد ده ما دام مالوش كرامة ، يعنى واحد مالوش كرامة تتوقعوا إن هو هيحافظ على نفسه إن ما حدش يقول عليه زنا ولا ما زناش ، ما تتوقعوش هذا الأمر طبعاً ، يبقى ده الإجراءات الوقائية

#### الشوط الرابع... نور الإيمان

ثم بعد كدة العلاج الجذري "اللَّهُ نُورُ السَّمَاوَاتِ وَالْأَرْضِ" النور: ٣٥ اللي هو إن ربنا ينور لك قلبك بالإيمان ، أنا عايزك تلاحظ حاجة مهمة جداً يا جماعة ، أنا عايزكوا تلاحظوا عظمة الشريعة الإسلامية ، أنا كان نفسي أتكلم معاكوا عن عظمة الشريعة الإسلامية ، و لكن أنا هاخطف خطفة واحدة بس كدة يعنى من مشاهد مبهرة في السورة ربنا يقول "وَالَّذِينَ يَبْتَغُونَ الْكِتَابَ مِمَّا مَلَكَتْ أَيْمَانُكُمْ فَكَاتِبُوهُمْ إِنْ عَلِمْتُمْ فِيهِمْ خَيْرًا" النور: ٣٣ لو عبد من العبيد اللي عندك جالك قال لك أنا عايز أتحرر ، أنا ها أديك ١٠ آلاف جنيه كل شهر ألف جنيه ، سيبني أروح اشتغل و أجيبهم لك و أبقي حر وافق بس على شرط "إِنْ عَلِمْتُمْ فِيهِمْ خَيْرًا" يبقى الإسلام مع تحرير العبيد بس بشرط إن العبيد يبقى فيهم خير ، يعنى إيه ؟

لما جت الأمم المتحدة بعد ١٤٠٠ سنة و قررت أول ما انعقدت سنة ١٩٤٥ م إنما تحرر العبيد جميعاً بلا أي شرط ، كل العبيد بقوا أحرار ، إيه الرحمة دى ؟ الإسلام قال حرروا بس على شرط "إِنْ عَلِمْتُمْ فِيهِمْ خَيْرًا" إيه الفرق يا جماعة في التشريعين ؟ ليه الإسلام حط القيد ده ؟ ما هو الوقى دى واحدة بنت ٢٠ سنة كانت بتاكل و تشرب و كانت ما تعرفش تعمل حاجة في حياتها فجأة قالوا لها أنت حرة ، أنا حرة أروح فين ؟ ده أنا أصلاً من بلد ثانية ممكن كمان و اتأسرت في حرب و الاجيت في حرب والا أسرتي مشردة في البلاد ، أروح فين ؟ دى هتبقى إيه ؟ دى هتروح و العياذ بالله ممارسة فاحشة ، طب الشاب اللي طلع ده ماكنش يعرف يعمل أى حاجة في حياته و لا معاه مهنة و لا عنده دين و لا اتربى على الدين ، لما يقولوا له فجأة انت حر ، طب أنا ما اعرفش اعمل حاجة و لا حد راضى يشغلني ، أنا كنت باشتغل في البيت مقابل إن أنا آكل و اشرب ، لأ ده هيروح يبقى حرامي عشان كدة تحرير العبيد الفوري ده بيؤدى إلى خروج بؤر فساد في المجتمع ، عشان كدة العبيد اللي إتحرروا لغاية الوقى في السعودية و في وسط إفريقيا و في أمريكا نفسها أكثر ولايات متخلفة في أمريكا ولايات السود ، ناس متخلفة تعليمياً و دينياً و كل حاجة ، و جنوب أفريقيا وسط أفريقيا زى ما انتم شايفين و في جنوب أفريقيا السود هما أكثر ناس متخلفين هناك ، ليه ؟ لأنهم إتحرروا فجأة

عايزين تحرروهم فعلاً بجهد دولة مش بجهد فرد اعملوا مؤسسات تأهيل مهني و مؤسسات تربية دينية لهؤلاء العبيد و بعد كدة حرروهم ، يبقى الأعظم شريعة الإسلام و لا الشريعة الثانية ولا الشريعة الحديثة ؟ طب ما العبيد كدة شرط صعب عليهم ، مش صعب ، ما هو لما واحد يلاقى أخوه و صاحبه العبد الثاني ده إتحرر عشان كان بيصلى

في المسجد و معاه حرفة يقول لك أنا كمان أتعلم حرفه و أنا كمان اصلي في المسجد ، ما دام دى السكة يبقى أنا هاعملها ، يبقى بهذه الطريقة بنخرج ناس صالحة في المجتمع

شتان.. شتان ما بين شرع الله و ما بين الشرع الكافر ، شرع ربنا العظيم ، إحنا دلوقتي بنقول الإجراءات ، العلاج العقابي و العلاج الوقائي و معرفه الأعداء و الوقاية منهم و العلاج الجذري ، مين في أى شرع عمل الكلام ده ؟ إيه الشرع اللي عمل الكلام ده ؟ بل في آخر السورة الإستئذان داخل البيت ، الإجراءات الوقائية داخل الأسرة ، الطفل يدخل على أبوه و أمه امتي ، و ما يدخلش عليهم امتي ، و أما يكبر يستأذن امتي و ما يستأذنش امتي ، و المرأة اللي بلغت القواعد من النساء تحط الحجاب و لا تاتخطش الحجاب و قواعد الإستئذان و قواعد ، ليه قواعد الإستئذان دى ؟ ما هو حتى جوه البيت فيه شرع ، في التاريخ كله وصل من وقاية المجتمع و حصانه المجتمع لهذه الدرجة ؟! عشان كدة أواخر الآيات دى كلها إيه ؟

**"كَذَلِكَ يُبَيِّنُ اللَّهُ لَكُمْ الْآيَاتِ" النور: ٥٨ "كَذَلِكَ يُبَيِّنُ اللَّهُ لَكُمْ الْآيَاتِ" النور: ٥٩**

النور: ٦١ آيات مش أحكام ، ده آيات يا جماعة ، الآية دى يعنى الدليل المبهر على عظمة ربنا و على صدق القرآن ، دى آيات يعنى لازم لما تسمع الأحكام دى نفس الإحساس اللي يبجي في قلبك لما تبص للسماء و السحاب و المطر و الشجر و الفراشات و السمك الملون ، نفس الإحساس من تعظيم الله اللي يبجي في قلبك يبجي في قلبك لما تشوف الأحكام دى تقول ما أعظم شرعك يا رب ، انت شرعك عظيم يا رب ، انت شرعك محكم يا رب سورة النور يا جماعة بتقول لك شرع ربنا عظيم أد إيه ، و محكم أد إيه ، و مترابط أد إيه ، و شامل أد إيه ، يبقى مصدر الفهم ، مصدر النور هو القرآن

الحاجة الثانية إنما بتنور لك قلبك بالإيمان **"اللَّهُ نُورُ السَّمَاوَاتِ وَالْأَرْضِ مِثْلُ نُورِهِ" النور: ٣٥** مثل نور الإيمان المصباح الجميل ، الكلوب الرهيب اللي لو ربنا وضعه في صدرك هتنور لبلد كاملة ، الكلوب اللي الفتيلة بتاعته منورة و الزجاجة بتاعته اللي هي قلبك ، الفتيلة اللي هي فطرتك منورة مشتعلة ، و الزجاجة اللي هي قلبك ده زجاجة ، ده كوكب درى ، ده الزجاجة دى منورة زى بالضبط نجم السماء المهول لما بينور و مخطوطة جوه مشكاة بتحفظ النور و بتكشفه عشان النور يبقى إيه ؟ يبقى مكثف و مجمع كدة و مركز و في نفس الوقت **"كَمِشْكَاةٍ فِيهَا**

**مِصْبَاحٌ الْمِصْبَاحُ فِي زُجَاجَةٍ الزُّجَاجَةُ كَأَنَّهَا كَوْكَبٌ دُرِّيٌّ يُوقَدُ مِنْ شَجَرَةٍ مُبَارَكَةٍ" النور: ٣٥** يعنى إذا كان المصباح اللي ربنا وضعه لك جوه صدرك الفتيلة المنورة و الزجاجة اللي حواليتها منورة ، و كمان صدرك لأمم النور ده و مجمعه مابيتشتتش و ما بيتبدش ، و كمان فوق كل ده فيه مصدر متصل للوقود اللي هو القرآن ، الشجرة المباركة ، القرآن المبارك اللي يمد قلبك بالإيمان و بيجدد الإيمان في قلبك باستمرار ، الكلوب ده لو عند خمسة بس مننا ممكن يفتحوا مصر دى كلها ، ممكن يفتحوا العالم الإسلامي ده كله ، ممكن يقبلوا المعصية في العالم ده كله ليه ؟ لأن ده يا جماعة كلوب ممكن ينور بلد كاملة بس لو موجود في إيه ؟ موجود في صدرك

**عايز طريقك يبقى منور ؟**

عشان يبقى الكلام عملي النور ده يبجي منين يا رب ؟ ربنا قال لك مصدر النور هو إيه ، شوفوا يا جماعة عشان اللي عايز يبقى جوا قلبه كلوب منور ، اللي عايز فطرته تبقى فتيلة متوهجة بالإيمان و عايز قلبه يبقى كوكب درى

من شدة إنارة الإيمان و عايز صدره يبقى صدر حاوي للنور ما يبدوش ، ما يسمش النهاردة كلام عن ربنا بكرة النور يضيع ... لأ... ده الكلام بيتجمع جوه قلبه ، اللي عايز يبقى قلبه متصل دايم بالنور و مشحون دايم بالنور ، اللي عايز يبقى هو منور و منور للناس جميعا ، اللي عايز سكتة تبقى منورة بهذا النور في طريقه إلى الله قدامه ست طرق إيه هما الستة ؟ تحطهم ست حلقات في ودانك و تكتبهم ست كلمات قدامك على المكتب اللي انت بتقعد عليه ... إيه هما ؟

### ١. الإفتقار إلى الله

لن يأتي هذا النور إلا بالله ، شوفوا سورة النور بتقول "وَلَوْ لَا فَضْلُ اللَّهِ عَلَيْكُمْ وَرَحْمَتُهُ وَأَنَّ اللَّهَ تَوَّابٌ حَكِيمٌ" النور: ١٠ "وَلَوْ لَا فَضْلُ اللَّهِ عَلَيْكُمْ وَرَحْمَتُهُ وَأَنَّ اللَّهَ رَعُوفٌ رَحِيمٌ" النور: ٢٠ "وَلَوْ لَا فَضْلُ اللَّهِ عَلَيْكُمْ وَرَحْمَتُهُ مَا زَكَا مِنْكُمْ مِنْ أَحَدٍ أَبَدًا" النور: ٢١ "وَمَنْ لَمْ يَجْعَلِ اللَّهُ لَهُ نُورًا فَمَا لَهُ مِنْ نُورٍ" النور: ٤٠ يعني إيه يا رب ؟ يعني مالکش أمل غير في ربنا ، يعني عايز النور ده ؟ من عند الله ، اطلبه من الله و خلى قلبك متعلق بالله ، **طرقت** الأبواب كلها إليك يا رب فوجدتها ملاءى حتى إذا **طرقت** باب الإفتقار وجدته مهجورا ، ماحدش بيدخل على ربنا بالإفتقار للأسف يا جماعة

### ٢. الإتصال الوثيق بالقرآن

الطريق الثاني و الباب الثاني اللي بيوصلك إلى هذا النور اللي بينور لك قلبك و بينور لك حياتك و طريقك و يخليك مصباح بينور للعالم كلها... القرآن "**يُوقَدُ**" قلبك بيوقد ، نور الإيمان في قلبك بيوقد "**مِنْ شَجَرَةٍ مَبَارَكَةٍ زَيْتُونَةٍ لَا شَرْقِيَّةٍ وَلَا غَرْبِيَّةٍ**" النور: ٣٥ التوازن والإعتدال و النور اللي بيسطع على الشجرة ليل نهار "**لَا شَرْقِيَّةٍ وَلَا غَرْبِيَّةٍ يَكَادُ زَيْتُهَا يُضِيءُ وَلَوْ لَمْ تَمْسَسْهُ نَارٌ**" النور: ٣٥ نقطه زيت ممكن تنور الفتيلة ، نقطه قرآن ممكن تنور قلبك ، آية واحدة يدخل معانيها في قلبك تنور لك حياتك ، أنا عايزك تخرج تقعد قدام آية تقرأ فيها ساعة لو دخلت قلبك ها تقلب لك حياتك ، الصحابة فيه منهم ناس ضحوا بحياتهم عشان الإسلام و ما كنش نازل من الإسلام غير صفحه أو صفحتين بس كانوا دخلوا قلوبهم يا جماعة ، يبقى عايزين الفتيلة تشرب الزيت ، عايزين قلبك يشرب القرآن و مش شرط الفتيلة تشرب الزيت كله ، ده لو شربت نقطتين زيت بس هتنور و هستوهج ، يبقى إذا ما تقعدش تقرأ تقرأ و خلاص ... لأ... عيش مع كتاب الله سبحانه و تعالى ، يبقى ثاني حاجة القرآن

### ٣. المسجد

ثالث حاجة النور ده فين كمان يا رب ؟ "**فِي بُيُوتٍ أُذِنَ لِلَّهِ أَنْ تُرْفَعَ وَيُذْكَرَ فِيهَا اسْمُهُ يُسَبِّحُ لَهُ فِيهَا بِالْغُدُوِّ وَالْآصَالِ**" النور: ٣٦ المساجد ، قعدتك الوقتي ، انت الوقتي الفيشة بتاعة الشاحن محطوة تصدق بقى و لا لأ ؟ إحنا الوقتي كلنا محطوتين في الشاحن يا جماعة ، قاعدين نتشحن و انت قاعد كدة بس ، المساجد ، اقعدوا في بيوت ربنا ، يا جماعة إحنا مش طايقين بيت ربنا يا جماعة؟! يعني أنا أسف في اللفظ بس دى حقيقة ، الواحد منا بيدخل بيت ربنا عايز امتي يخرج ! امتي يخرج ؟! لأ اقعد كدة ، حتى و الله من الحاجات الجميلة للطلبة ، جرب إنك تذاكر في المسجد ، جرب كدة ، انت ورد مذاكرتك مثلا من العصر ، مثلا عايز تذاكر من العصر للمغرب ادخل المسجد اقعد ذاكر في المسجد ، اقعد في المسجد ، خلى عود نفسك إنك انت تأنس بجوار الله ، إحنا في جوار الله ، إحنا في

بيت الله ، مش بيت الله اهو ، أنا لو جيت لبيتي تلاقيني و لله المثل الأعلى ، ربنا ، إحنا في معية الله الوقتي يا جماعة ، عود نفسك إنك تقعد في معية الله و في معية الملائكة اللي مالیه بيت ربنا و بتعبد في بيت ربنا ، يبقى إدمان المساجد انك تقعد في مساجد ربنا ، طب يقعدوا في المساجد يعملوا إيه بقى ؟

#### ٤. العبادة ... قوة العبادة

"يُسَبِّحُ لَهُ فِيهَا بِالْغُدُوِّ وَالْآصَالِ" النور: ٣٦ جلسة الضحى و جلسة قبل المغرب بساعة ، جلسة الضحى يا جماعة على الأقل ، جلسة الضحى دى نضيعها إزاي؟ ، لازم تبقى ورد ثابت في حياتك ، في حياتك حاجة ثابتة كدة ، أوراد العبادة ، جلسة الضحى ، أذكار المساء ، قيام الليل ، لازم ، طب أنا الوقتي راجل طالب ، طب انت طالب من المغرب للعشاء و ما تفتحش حاجة و لا بتلحق تذاكر و على ما بتطلع من صلاة المغرب تكون العشاء أذنت ، اقعد من المغرب للعشاء في الجامع مستثقل تعبد ربنا في بيت ربنا ليه ؟ خلى عندك انس بالله يا أخي ، يبقى رابع حاجة العبادة و قوة العبادة

#### ٥. الدين يحوط بكل جانب

"رِجَالٌ لَا تُلْهِيهِمْ تِجَارَةٌ وَلَا بَيْعٌ عَنْ ذِكْرِ اللَّهِ" النور: ٣٧ هما سابوا التجارة و البيع يا رب !؟ لأ... بس ما اتلهوش بيها ، يعنى إيه يا رب ؟ يعنى الموازنة ما بين الدين و الدنيا في حياتك ، الدنيا ما تطعاش على الدين ، خذوا بالكوا يا جماعة فيه الناس كذا نوع ، فيه منهم نوع دنيا بس ده ضايع ، ده قلبه ده فيه كمية شهوات يوم ما تبلى سريرته قدام ربنا الله أعلم بالخزي اللي هيبقى فيه ، و فيه واحد الدنيا هي كل حياته و لكن بيعجى يحضر مثلاً درس في النص ، يعنى دنيا و بعد كدة درس في النص و بعد كدة يرجع للدنيا ، ده مدى لربنا حاجة بسيطة يعنى كل أسبوع ساعة مثلاً ، فالدنيا محيطة بالدين من جميع النواحي بحياته ، فو هوا قاعد في الدين بيفضل ذهنه مشغول بالدنيا و واحد الدين هو اللي محيط بالدنيا زى دول كدة جلسة الغدو اللي هو قاعد جلسة الضحى ، و بعد كدة أذكار المساء بالليل ما بينهم الشغل بتاع الدنيا المذاكرة ، الدراسة ، التجارة يبقى الدين هو اللي محيط بالدنيا فيفضل و هو في الدنيا قلبه معلق بالله ، يبقى لو الدنيا هي اللي أحاطت الدين مش كفاية هيفضل قلبك معلق بالدنيا ، و لو الدين هو اللي محيط بالدنيا دائماً الدين هو المبتدأ و المصب ، قلبك في الدين هيبقى إيه ؟ قلبك في الدنيا هيبقى معلق بالله سبحانه و تعالى

#### ٦. التدبر في خلق الله

الحاجة الأخيرة مصادر النور ده "أَلَمْ تَرَ أَنَّ اللَّهَ يُزْجِي سَحَابًا ثُمَّ يُؤَلِّفُ بَيْنَهُ" النور: ٤٣ انت مش شايف و هو تحت جنب بعض كدة و بعد كدة تكبر تبقى سحابة كبيرة "ثُمَّ يَجْعَلُهُ رُكَّامًا" النور: ٤٣ السحاب الركامى مانتش شايف المطر و هو نازل من السحاب جميل إزاي ؟ "فَتَرَى الْوَدْقَ يَخْرُجُ مِنْ خِلَالِهِ وَيُنْزَلُ مِنَ السَّمَاءِ مِنْ جِبَالٍ فِيهَا مِنْ بَرَدٍ" النور: ٤٣ ما انتش شايف البرد و هو نازل من السماء ؟ "فَيَصِيبُ بِهِ مَنْ يَشَاءُ وَبَصُرُفُهُ عَنْ مَنْ يَشَاءُ" النور: ٤٣ ما انتش شايف البرق ؟ "يَكَادُ سَنَا بَرْقِهِ يَذْهَبُ بِالْأَبْصَارِ \* يُقَلِّبُ اللَّهُ اللَّيْلَ وَالنَّهَارَ" النور: ٤٤: ٤٤ ما انتش شايف آية الليل و النهار و دخول ده في ده و دخول ده في ده ؟



"وَاللَّهُ خَلَقَ كُلَّ دَابَّةٍ مِنْ مَاءٍ" النور: ٤٥ فيه اللي ماشى على رجلين و منهم من يمشى على أربع و فيه اللي يمشى على بطنه ، ما انتش شايف التنوع و الإبداع في خلق الكائنات ؟ التدبر في خلق الله ، التدبر في خلق الله يا جماعة ، انك تبقى إنسان متدبر ، يا جماعة الكون بيت في القلب إيمانيات لا تقل عن الإيمانيات اللي بيثها القرآن في القلب أبدا ، دى آيات الله المقروءة و دى آيات الله المنظورة ، الكون ده يا جماعة ممكن يوصلك ، للأسف أنا بأقول لكوا القرآن و "إِنَّ قَوْمِي اتَّخَذُوا هَذَا الْقُرْآنَ مَهْجُورًا" الفرقان: ٣٠ حتى لما بنقرأ بنقراه في شهر رمضان و بنقرأ و خلاص كدة بسرعة ... لأ ... نقرأ صح ، بأقول لكوا الافتقار و هو أكثر باب مهجور إلى الله ، بأقول لكوا التدبر و أى منطقه خلوية الوقتي تروحها تلاقيها فاضية إلا لو واحد فلاح و لا واحد نازل جايب الحمار بتاعه يلم شوية غله و لا حاجة ، ما فيش حد عايز يتدبر ليه ؟ الناس زهدت في التدبر في خلق الله ليه ؟ ليه تزهّدوا في التدبر ؟ ليه الأبواب الستة دى بقت أبواب مهجورة ؟ يبقى إذا المصادر الستة للنور

#### ١. الإفتقار: إفتقار القلب إلى الله

٢. الإتصال الوثيق بالقرآن : إن قلبك يشربه ، يشربه فعلا بحق و حقيقي ، و الإتصال المستمر بالقرآن

٣. المساجد : إنك انت تأنس بجوار الله في المساجد حتى الدنيا ممكن تذاكر في المساجد

٤. العبادة : إن يبقى ليك أورااد عبادة بتحاوط الدنيا

٥. الإنضباط في التعاون مع الدنيا : إن الدين يبقى هو اللي محاطها عشان إيه ؟ عشان يفضل قلبك فيها معلق بالله فتؤجر عليها زى ما بتؤجر على العبادة

٦. التدبر في خلق الله : التدبر في معجزات الله الباهرة في الكون ، التدبر في آيات الله اللي بتزلزل القلب بس لما تحس بيها ، لما تروح كدة بعد خمس ست مرات جلسات تدبر هتلاقى قلبك خاشع بالضبط زى ما قلبك بيخشع في القرآن بعد خمس ست مرات قراءة بالمجاهدة

و تحتهم سوره النور بآية غريبة جدا و هي قول الله سبحانه و تعالى "إِنَّمَا الْمُؤْمِنُونَ الَّذِينَ آمَنُوا بِاللَّهِ وَرَسُولِهِ وَإِذَا كَانُوا مَعَهُ عَلَى أَمْرٍ جَامِعٍ لَمْ يَذْهَبُوا حَتَّى يَسْتَأْذِنُوهُ" النور: ٦٢ السورة كانت كلها بتقول لك استأذن الأول قبل ما تدخل البيوت ، استأذن من والدك ووالدتك قبل ما تدخل عليهم ، الإستئذان داخل البيوت و خارج البيوت ، يعنى أدب الإستئذان ده حتى مع رسول الله صلى الله عليه و سلم ، يعنى المؤمن مؤدب في كل حاجة و الدين كله بالنسبة له معاملاته مع الناس ومعاملاته مع الله كلها متخلق فيها بنفس الأخلاق ، فيقول لك الإستئذان مع رسول الله ، أوعى تستأذن لما يكون المسلمين محتاجينك ، أوعى تتخلى عن الشكر لما الدين محتاجك ، طب يا رب ده إحنا كنا قاعدين نتكلم في الموضوع و فجأة خرجنا في موضوع تاني ، عارفين عامله زى إيه بالضبط يا جماعة ؟ عارفين خاتمة سورة البقرة ؟ سورة البقرة قاعدين نتكلم عن الربا و نتكلم عن الأحكام و نتكلم عن الطلاق و نتكلم عن الإنفاق ، و المؤمنين بيدعوا يا رب اغفر لنا و ارحمنا "وَأَعْفُ عَنَّا وَاعْفِرْ لَنَا وَارْحَمْنَا أَنْتَ مَوْلَانَا" و فجأة انت مولانا فـ إيه ؟ "فَانصُرْنَا عَلَى الْقَوْمِ الْكَافِرِينَ" البقرة: ٢٨٦ ، تحس إنك انت فجأة فوقت كدة هو إيه ؟! ده إحنا كنا الوقتي يعنى بنتكلم في شوية أحكام ، إيه اللي رجعنا للقضية الكبيرة قضية نصره الإسلام و قضية التمكين للدين ؟ ، أهى خاتمة النور عامله زى خاتمة البقرة كدة تلاقى نفسك رجعت لإن الدين محتاجك ، و إنك لازم تقف

على الثغر و اوعى تتخاذل عن نصرة الدين ، و انك انت لو تحاذلت عن نصرة الدين يبقى ده ذنب محتاج إن الرسول صلى الله عليه وسلم يستغفر لك زى ما ربنا أمره في آخر السورة ، استغفر للي بيستأذنوك كأنك انت عملت ذنب بالضبط إن الدين محتاجك و انت تحاذلت عنه أو حتى رحت ساعة واحدة عما ترجع له تاني إيه اللي دخلنا لجو الرسالة و الدين و القضية و الدعوة و التربية و إقامة الدين في الواقع و الجهاد ؟ إيه اللي يا رب دخلنا في القضية دى ؟ عشان تاخذ بالك إن كل ده عشان ده ، ده كل ده انت بتتربى و بتتمدن عشان الهدف الأعلى اوعى تنسى في أى لحظة هدفك الأعلى و هو انك انت ما تموتش غير وانت زى مصعب كدة الراية بتاعة "لا اله إلا الله" مرفوعة فوقك

أقول قولي هذا و استغفر الله لي و لكم  
سبحانك اللهم و بحمدك اشهد أن لا اله إلا انت استغفرك و أتوب إليك  
تم بحمد الله

شاهدوا الدرس للنشر على النت في قسم [تفريغ الدروس](#) **تفضلوا هنا :**

<http://www.way2allah.com/forums/forumdisplay.php?s=d5fa851b936c6742ef5d2ac53524ee58&f=36>